

近代中國史料叢刊第十六輯
沈雲龍主編

述德筆記

毓長著

文海出版社印行

W7-10

述德筆記目錄

卷一

先考多羅定慎郡王行述

記兄朗授職前後家居狀況及就神機營委員事

記余兄庚子義和團之亂避地北山事

卷二

記兄依肅邸之始

記兄司權務事

卷三

記兄自記赴日本考查土木警察事

卷四

記兄任工巡局監督事

記余兄爭王維勤案及李馬氏案事

卷五

記兄任宗室覺羅八旗中學堂總教習事

記兄任鴻臚光祿內閣學士時事

記兄升巡警部侍郎事及入陸軍學堂聽講

記余兄襲封並在御前行走事

卷六

記歡迎美艦事

卷七

記兄任步軍統領事

記左翼翼尉福壽使人勅振林事

記兄任專司訓練禁衛軍大臣事

記設軍諮府事

記余兄任法政學堂總理事

記余兄任軍機大臣事

記余兄往資政院事

記辛亥禪讓事

記洪憲元年夏余兄擬東渡不果事

卷八

記兄任宗人府堂官事

記余兄選參院議員事

記余兄被選同鄉會名譽會長事及辭都統事

跋

述德筆記

先考多羅定慎郡王行述

十丈愁城主人撰

先考多羅定慎郡王。以閒散宗室讀書於先祖。定敏親王邸。咸豐四年甲寅。承嗣於。定敏親王。旋襲封定郡王。先是。先考家極寒。本生母林太夫人。躬操井臼者十餘稔。屢產。甫落藉。輒不育。比。先考生。收生婦。又令閉目。忽有冷水一盃墮地碎。問之。不能對。概收生者。爲。先考之嫡母。母家人。或存常人之見也。先考既生。以家貧故。林太夫人劬勞倍至。年少進。值。先祖定敏親王無嗣。使。先考與。先叔同讀書於邸。先叔性敏悟。先考課程不能逮。以故。首領管事官等。多加白眼。亦順受之。久之。先叔以約束太嚴。求去。事乃定。迨。先祖病亟。乃奏明奉。旨賞封鎮國將軍。先祖沒。遂襲封。當日倉卒臨大事。家務全付首領管事官。未嘗問。故物多散失。先考則惟知致敬盡禮。安命信天而已。後服除。

顯廟親臨觀射。王公中有被譴者。先考夙近視。比射。五發。有一箭穿舊孔。未聞聲。射迄。自報中四箭。

上亦笑領之。旋

賞穿黃馬褂。其誠篤無機心類如此。庚申之變。正寓蔚秀園。倉卒東行。追隨顯廟。棄家而去。未嘗反顧。備極艱辛。始抵熱河。同治初元。隨

鑾自熱河歸。卽告退家居。禮佛。頗好修真養性之學。當隨

鑾東去也。先庶母力持鎮靜。以安先嫡母之心。徐謀東行。追先考。終抵行

在。然首領太監及護衛等多亡去。蔚秀園爲土匪劫掠一空。家遂中落。故晚年家入不豐。先考每食。以蔬菜爲常。冬則一布棉衣。夏一葛衫。有時持一自來柄之蕉葉扇。一東洋沙壺。徘徊樹下。悠然自得。最樂拯人危急。好施與。不殺生。野鴿羣集。以高糧布院中。並設水槽。恣飲食之。一日聞府後有哭泣聲。詢知爲喪夫無以殯者。卽搜箱篋。得十金。畀之一孫姓老僕婦。爲子娶婦。甫下轎。卽瘋

癩。百藥不效。後值房主人娶婦。瘋人叫罵不已。賀客爲之裹足。主人下逐客令。僕婦子謀斃其瘋婦。以棉塞瘋人口。縛置床頭。鎖門而去。意欲以餓斃之也。先考聞之大怒。卽使人釋而置之邸中。不加禁錮。任其飲啖遊行。約半載餘。一日痛哭遂清醒。後乃歸其家度日焉。每春秋佳日適郊外。乞丐皆尾之。時傾囊與之。尤喜釋放鳥之被捕者。晚年又遇庚子之役。避地北山。家遂覆。然居山中兩遭潰勇之劫。終以好施之故。山後村人執器以救之。赴難者雖多徒手而來。然以人數甚衆。山鳴谷應。勇懼而奔。村人死者三。府中員役死者三。夜半勇始繳械降。十餘勇村人皆斃之。先是 先祖定敏親王有圖章。曰。曾存定府行有恒堂。書畫器物多以此誌之。庚申之亂。失於蔚秀園者半。至是盡付劫灰。間有鬻諸市以供日用不足者。不過十一而已。平生性爽直。面折人之短。以故人憚之。年七十七薨。朝廷予諡曰慎。

記兄朗授職前後家居狀況及就神機營委員事

予兄毓朗。字月華。號餘痴。幼多病。性愿謹。雖父母鍾愛逾常。平日未嘗索一衣。擇一食。隨所遇而安之。府中門禁森嚴。鮮出入。故二十歲以前。未嘗見外人。以先考之慈祥也。兄對待人亦無急言劇色。習爲節儉。不殺生。好善樂施。家中人衆多。時有是非之言。輒掩耳急走。不欲聞之。終日手不釋卷。先庶母側太福晉瓜爾佳氏。御下嚴而不苛。慈而有法。生兄一人。視之如珍。然起居飲食。未嘗縱其所嗜欲。故府中僕從雖衆。無敢導之荒嬉者。庭院極廣闊。鎮日清寂如無人。當興始興。當息始息。早晚皆有定時。早起冬方秉燭。夏亦日未升也。故睡極早。長夏亥初殿門闔矣。予兄輒以燭一。茗碗一。壺水一。書若干卷。獨坐閱之。比子夜。燭盡壺罄。始就寢。兄嗜讀。嘗終日不輟。家人請就餐。諾之而不能止。輒冷而再煖之。故先庶母嘗使侍兒奪之。始就席。尤嗜飲。水量兼人。後至老尤不異也。年二十四。臘盡應考。應封宗室。值禮邸丁憂。額相未查成案。卽以滿

洲鄉試題入擬。比題紙下。滿文逾舊例五倍有半。同試十人。落第者五焉。先是試馬步射。十人中。射全中的者五。兄與焉。其餘或中馬射。或中步射。只際君亨一人脫槩而已。比入試於

乾清宮。辰正題帡始下。以題目過長。有賄內監。以捧盒送繙書房。倩人捉刀者。首商之兄。兄執不可。有同試隆某。年逾四十。屢試不售。乃同倡議者爲之。後倡議者中式。此君仍落第。竟終身未受封而沒。是役惟肅邸實以三優授職。兄與溥尙書良。皆以兩優一平授職焉。兄嗜讀。家富於收藏。庚子前。有室七楹。皆貯以書。玩好則另庫存之。兄於玩好珠玉之屬。百無所好。惟嗜書。故惟書庫之鑰。先考令兄司之。恣其翻閱。以增其學識。時長兄猶健在。舊俗府屬多希後福。利害所在。於王子弟兄歧視之。內監等更時有恃以驕恣出危言者。初尙憚側福晉嚴明。既福晉患中風。府事漸弛。兄乃益自飭。食不擇精麤。衣不擇美惡。居處不求安適。屏一切玩好。而遠之。其意謂今日力自克苦。庶他日凍餒尙

可支持。否則直自遺其害耳。久之。遂成習慣。後遂安之。兄幼而孱弱。八月卽生。以未足月故。幾不育。故弱不好弄。除習射外。家人亦不許其近武事。年十七歲。試馬步射。令嚴。不許不到。兄乃毅然日事馳逐。在他人所優爲者。兄爲之倍苦矣。嘗自述其初乘馬時。時時不作瓦全想。以是胆轉巨。策馬行仄徑石齒磷磷。或越山嶺高下隨之。皆無所憚。初兄弟姊妹行。常以兄弱不能騎乘笑之。目爲雖蟆亦不敢乘。蟆與馬。俗同音也。至是始驚奇之。比中式。封鎮國將軍。除每歲四孟歲暮祫祭往執事外。無他事。故日惟坐擁書城。以消歲月。先是國初時。諸王公分領二十四旗。兼議政事。比入關。天下底定。文事日盛。諸王公漸失政柄。才識亦日退。賢者只嬾青妃白。安分隨俗而已。宣廟以宗支日弱。稍稍進用公以下之世爵。文廟繼之。用鄭王等。不幸值西力東漸。全球一變鎖國之風。正四海沸騰之時。乃以斗筭之人。當國事綢繆之日。覆敗其能免乎。同治以後。雖有賢者。投閒置

散。無如之何。同治初元。樞府懲羹吹齋。宗室世爵。率遭擯棄。故當庚子以前。除一二備位王公。如禮恪親王者外。均坐耗廩祿。以盡餘年。公以下。所入不足溫飽。率昵近匪人。放僻邪侈。無所不爲。自好者。亦只安分耐貧而已。余家自乾隆四十四年分府。已歷百餘年。故物保存。未嘗散失。不幸庚申之役。失其大半。尙存有珊瑚帖墨蹟。及唐模晉右軍帖墨蹟等冊卷。先王晚年。漸出所藏濟日用。適有趙松雪畫冊等件。付內監鬻諸市。後月餘。賈人賚送樞府某公邸。仍托言余家所寄售者。某公遂直接商之。余長兄。許付重金易之。物交易已久。無從索還。又不欲開罪當道。有點者主謀。請當道調次兄於神機營。旋責其轉環。次兄怒。拒之。遂在營充小委員。無所事事。與衆落落寡合。無可共語。總辦岳柱臣。尙優禮之而已。年餘。後屢開保案。同事多受優獎。兄迄無所得。同人初憚之。至是皆挪揄之矣。兄每差必到。惟無所求。盤費皆自出。亦不與聞其事。所至閉門觀書而已。營演武成永固砲於南苑。砲南懷仁造。長丈三尺有奇。十一月雪

後森寒。天微明。兄尙立永定門外。隨衆視運砲車出城也。比演。砲以不用久。炸裂。遂止操。既。總辦欲開保二三人。中列某尙書子姪某。實未與其事者。有廣君英者。爭之。遂止。兄自是識廣君。後遂訂交。廣君字叔涵。自幼隨其父出使歐西。爲中國遣使出洋之嚆矢。老復隨楊公使使美。久習風濤之險。性爽直。往往面折人之短。恃才傲物。衆皆惡之。廣君惟與兄善。一日自以巾絜一巨榴。親手相贈。兄出庭中岡榴酬之。他日謂兄曰。前日余所獲之安石榴。自以旣碩且甘。持以相贈。不虞君所出之物。子大而甘。遠非吾榴之比。吾所持者。直遼東豕耳。相與大笑。其不羈如此。概余家之安石榴。乃河南種。先王乳母。以榴實手種者也。兄在營八年。每月受津貼兩許。同寅多膺薦剡。兄未嘗有所求。當行則行。當止則止。得失利害。俱不問。局中有一委員余仁。嘗上書請編練龜蛋陣。閱其書。乃使兵丁著綠衣。背負籐甲。手握木球。中實以灰。匍匐行至敵側。立以灰眯其目。云可操勝算。書上。王大臣交營議之。余兄笑曰。曩見南苑有袁某獻策。所築

成之砲台。縛砲於柱。台周劃分若干度。用以射標。固易。惟不復能俯仰。近至火線內。則束手無策。試以余委員此策攻之。當無不勝矣。衆大笑。余仁。市井之無賴。自稱爲天師高足弟子。時以販鴉片漏稅投營。袋中名片。或曰。二品銜道員某。或曰。四品銜知府某。實則一候選縣丞耳。值甲午與日入戰。故欲藉以進身也。兄於庚子春辭營差。交游既寡。惟與世交潘君安濤。及廣君叔涵。時相過從。潘君名慶瀾。字安濤。惻惻無華。內剛方而外和緩。不以圭角示人。嘗爲御史。多所觸忤。惟不言瑣屑事。嘗會鞠重案。多所平反。衆論推之。工詩文。有宜識字齋集行世。兄好山水。每謁先人園寢。輒旅行不休。登山必思涉其巔。力竭則臥草際。少蘇。復上行不已。往往至最高處。此習至老不衰。偶得句輒書之。然不屑規規作帖括日課之舉。嘗自評所作。謂吾詩以聲律規矩繩之。無一可取。苟以精神理趣求之。或少不由衷之言耳。庚子存稿散失。後始搜集諸作付印。曰餘痴初稿。概備遺忘。非定本也。

記余兄庚子義和團之亂避地北山事

庚子義和團事起。京師鼎沸。白晝殺人縱火。無敢櫻其鋒者。先是余兄弟輩。隨先考往鄰寺。視團人之演練法術者。時團匪初入京師。向夕就西城口袋底廟。設壇聚衆演之也。歸路。兄在。先考前。百端譬喻。力陳團術之不足恃。先考領之。時護衛內監等。已多入壇者。聞而大譁。壇上卽已聞之。不久。遂詆兄爲奉教之人。幾不測。長兄偶爲所惑。欲設壇於室。先考不許。以壇上殺人。非先考之所樂聞也。長兄室有內監孫得順者。奸險異常。疑兄室有積蓄。日唆團上人。時出危言欲害兄。甚至團人來府者。一履府之東偏。輒上體。團上人呼神言遇奉教者。始上體也概兄之住室在府之東偏故也。兄素患胃病。見西醫云。絕食若干日可愈。乃絕食。日飲牛奶二三瓶而已。甫五六日。卽遇義和團事起。兄猶力持不食主義。但飲牛奶。日漸尪羸。形削骨立。團人指爲奉教之故。兄平日好博學。案頭有化電光算天文地學工業及西文字典等書。當日北京風氣未開。皆非

世家之所習見。壇上令住戶皆張紅布燃燈潑水。家人從之。兄贛直執不許。用是益遭詆毀。先考購一鐵貫。不須鑰匙。但轉橫前之輪。左右迴旋各若干次。即可啓者。惟初鎖時。必須牢記四週度數。四次之分配。否則終古無開時。先考試爲鎖之啓之者屢。久竟忘其度。貫不能啓。幸中未有所儲也。會有流言云。各使館及北堂將攻破。少定。卽由端邸率團搜查各府者。兄建言。團人半皆愚魯。日前有大車載一文弱書生。偕妻一子一。蒙紅巾者數十。押之赴壇。云獲得二毛子也。問其憑證。卽舉一花露水。瓶曰。此確證也。簇擁由府門前南去。其不通如此。脫覩此貫。問其所儲。不能啓驗。則禍作矣。先考然之。乃使大糧倉夫役。掘地埋之。貫重。十數人始能舉。兄亦退搜書室之西學各書。焚而埋之。瘞厠院。後城破。竟爲宵小導法人掘出之。鐵貫不能啓。以炸藥轟而鑿之。有被傷者。開而視之。中空。徒周張矣。秋七月。戰屢敗。團勢漸殺。莊邸載勛。久不通聞問矣。忽遣內監來。向兄索陳洋煙。云王夙嗜此。今無從覓。知余府有陳存者。故來乞。

詢以團事。輒云不可信也。兄書房一栢唐阿。名致祥者。伺而不願。團初起也。兄不之信。試使人如式演之。以視其究竟。致祥不能如式。兄飭之。明日入口袋底廟中之壇。聲言兄爲奉教者。使人呼之不來。謂恐破其術也。蓋暗中有使之者。孫德順輩嗾之也。至是亦自來見。問其術。以涵胡答之。兄以流言之故。不敢遊行街市。日惟看書奕棋。余有一隨侍栢唐阿。名瑞斌。人極明白。兄平日課之讀大蘇文。至超然台記。寶繪堂記。養生論等。皆深有所契。深惡義和團。且預知大事不可爲。城必破。人必出走。閱嘗語兄曰。斌侍九將軍者也。一旦亂作。城且不守。斌惟從將軍。不復能顧公矣。兄偉之曰。微子言之。亦將以此詔子矣。卒賞之。事詳兄所著栢唐阿瑞斌庚子殉難記。庚子秋七月。拳匪氣衰。市漸小安。外事勝負。寂無所聞。居民轉賴以少蘇。中元節屆。先考遣兄往北山。致祭。先曾祖。先祖兩處園寢。距京六十里許也。兄以團上人尙守城門。搜行李。輕騎滅從而去。平日遊山輒携遠鏡風雨針寒暑針等。此役盡屏去。到葫蘆河園寢後。

次日往寶山致祭。中元後二日甫束裝歸。則先考率余輩。偕巴惇甫侍郎瀛眷。及意德菴上公家屬。棍貝子額駙奉母及余姪女。車數十輛。麟麟至矣。時先考以予告久。陡聞

變輿將巡幸山西。故先來此。昌平固西行必經之路也。二十日晚亥刻。忽南方火光熊熊。初疑卽在林際。家人驚爲兵隊營於林外。欲放馬令逸去。恐其嘶以致寇也。兄執不可。曰。姑使人覘之。事確。區處之未晚也。乃使人往。愈卽愈遠。終不可得。後始悟其爲北京失守。後門一帶俱兆焚如。其光竟達六十里外。視之如目前耳。次日聞

兩宮已西去。南口已爲兵截斷不可通。不得已。先考乃携眷入北山。夜行經香屯村。村宿潰勇多名。幸已寢息。比夜行失道。誤向西北去。迨明始知之。乃折而東北。入山登麓。甫息。卽聞香屯之勇。聞聲起追。駐要隘。不意余等失道西繞而越之。是有天焉。先考平生多似此。豈信天安命之懷。有不期然而然者耶。

卽聞勇至。乃使眷屬避往東山之東。先考率余等守以俟。旣聞勇已由山前轉而西去。兄乃奉命布置防務。顧家中槍械無多。且人少勇敢能射擊者。乃使隨侍人等。分往東西山隘駐守。掘山頭石塊。備憑高臨下以擊賊。計雖拙。不得已也。甫決策未行。而寇至。概潰勇繞至山後西面。登山而來。甫覩面。已從西隘據西山頂。有一似官長者。執旗麾衆射擊。彈如雨下。乃先考扶一隨侍立山坡。余弟兄侍左右。忽一彈中隨侍陸祥左脇下。距先考不及尺也。余等亟扶先考入山溝。息樹下。時家人四匿。不相知也。久之。聞蹄聲。下山緩緩去。日漸落。乃收集家人。回廟。始悉隨侍瑞斌死事焉。兵之初來也。家人驚散。斌獨持余筥篋。匿山石間。屢往屢返。甫復回廟與賊遇。中彈者再。入路旁更夫休息之室。死焉。棍貝子額駙家一護衛。巴宅一護院者。死山梁間。受傷者數人。余家失物尙不多。棍貝子之母。携銀萬餘兩。盡被擄矣。晚家人聚處。相對無歡。次日少息。二十三日。日方晡。忽聞西山後有槍聲。使人覘之。甫轉山坡。卽飛奔而回。但言

又來矣。請速避。問其人數。云遍山谷不計其數。乃倉黃令家眷仍往東山東。屏擋行李。匿東山溝畔。既聞槍聲不絕。而人聲雜沓。間以呵罵。分兩路而至。一自西山。一自山下。洶洶麇集。久之。忽聞人行聲。有呼王爺在何處。吾等來救也者。乃有諾而應者。云王爺在東坡下。衆乃出見。始悉賊十餘人。持快槍入山。概聞前日之勇。飽載而去。欲尤而效之也。山居幽僻。距山口尙二十里許。一徑廻環。隨河套倏左倏右。兩面之山。犬牙交錯。本山初名玉峯山。高五里許。寺近峯巔。山下河套不甚寬廣。草木叢密。人易忽之。山後漸寬。有村二。皆名三家村。土人。以上下莊別之。由山後來。距寺左右皆四五里路。潰勇之登山。前自西來。卽由下莊後。登山越嶺轉至也。先是村人聞日前寺有被劫之事。卽糾衆來守衛。以平日先考善待該村人。嘗爲之鎮攝土豪。而村以僻在一隅。又多守法之思也。未議定。卽報潰勇至。乃兩村無少長人盡出。且呼且罵。或執火槍。或執鐵鎬白梃。甚至徒手隨行。分路逐之。勇驚懼。槍傷一人。衆益憤。勇奔山頭。卽寺後之

峯頂也。一驢滿載子彈。蹶而覆。勇雖執快槍。只隨身數彈。彈盡無繼矣。村人一面環攻。一面力詬之。此余弟兄伏處時。聞呵罵聲之所由來也。既回寺。日已向夕。村人圍山頭。有著白衣褲。近而攻之者。賊又傷二人。至夜半。賊乞降。先繳械。乃登而縛之。賊著軍衣。肩有武衛右軍字樣。嗚呼。誰生厲階。致閻閻之遭害。至此極也。甫明。村人留數人守寺。余等優禮之。致謝意。先考囑村人。所縛之賊。勿盡殺。擇其弱者釋之。村人乃繫羣賊去。下午村人又縛一人來。云有一賊自夜半逸去。一晝夜不能覓得出山路徑。饑疲不堪。投村乞降。余兄曰。此窮而來歸。必赦之。無爲已甚也。村人乃繫去。後聞并夜所繫者。皆殺之矣。概村中此役死三四人。深恨之也。先考使兄與村人協議防務。人心漸安。久之。有言上下莊。將遣人往長城運舊砲。置村首以鎮宵小者。衆白。先考請效之。先考召兄謀之。兄曰。不可。運砲之旨。爲示威於匪耶。土人知廢砲之無用。徒示以弱。示威於山外耶。洋兵正據京城。好事者將云。有一王爺聚衆固守。火砲若干座。兵

若干人。則是引之來也。長兄曰。否。爾慮之過也。兄執不可。且曰。山中經費竭蹶。以此有限之財。營長物。尤非所宜。乃止。後二日。忽傳上下莊雇人埋砲。云山外洋人聞之矣。將來搜查也。先考笑爲余兄曰。運砲埋砲。微爾言。徒周張矣。兄素弱。家事一切不問。人多以駭目之。姻婭有謂其饑飽不自知者。家嫂未過門時。岳家有使昆季輩專以此遍詢隣右之事。其後目爲笑談。至是。先考喜益信之矣。無何。天漸寒。先考菲飲食。衣褐。力持鎮靜。兄以一極厚棉馬褂禦寒。著則兩肩不勝其重。釋之則寒而慄。余等亦如之。日食糠粃以度日。巴宅諸公子。尤不勝憔悴。時對泣作楚囚。兄輒朗誦古詩以慰之。嘗背誦同谷七歌。二公子尤爲感傷。忽。伺將軍至。欲偕兄往麻子港。寺亦家廟也。距玉峯山寺尙二十五里。地近黃花鎮。兄固辭。以。先考方殷憂未釋。不敢發遊山之興也。伺將軍乃獨往遊焉。旣。意德菴上公徒跣冒雨至。一路荊榛牢确。極跋涉之勞。而勇氣勃勃。若有餘焉。當此喪敗之餘。二公一襟懷高雅。一勇往無前。信吾宗

之卓卓者。抑亦先人耐勞拔俗之風。有以遺之也。秋盡。京師漸安。慶邸奉命偕李傅相與聯軍議和。先考乃携眷歸京。本府第在西城瞻雲北大街路東。門臨通衢。先考之出也。盡封鎖各門戶。只略携什物而已。一以團匪滿城。兵勇載道。物多不易携帶。一以庚申之變。先考隨扈北去。京邸由護衛駐守。除蔚秀園隨園明園之難被搶外。府中固少損失也。乃城破。家人盡散。一切書籍衣服器用盡失。甚至窗上玻璃。殿上方磚。均被匪徒劫掠一空。初。先祖定敏親王有室。曰。行有恒堂。凡自用自製書畫器物。無不有此圖章爲識。或曰。行有恒堂製。或曰。曾存定府行有恒堂。庚申在園失其半。至此又失其半。而精華盡矣。府爲法人佔據。不得歸。先考乃擬借寓阿拉善王京邸。下山時。初約同余策騎行。以始入山時正黑夜。余與兄越鑿鑿牛蹄等嶺。下行奇險。馬縮縮不前。歸時兄欲仍試此險。竟臥病不能興。以肩輿歸矣。甫至。先祖園寢。晚又聞警。先考以兄病甚。恐賊至不能避。使之先携妻女歸。兄泣曰。置老父於險。

地而先去。必不可也。乃先使嫂等歸。既歸京。阿拉善京邸無餘舍。遂就東城安伯胡同養疾。與肅親王朝夕與共。王兄應封大考之同年也。

記兄依肅邸之始

兄閉戶讀書。一切酬應皆不出。余弟兄以不同母故。年齒距頗遠。長兄長次兄十二齡。次兄長余十八齡。故親朋婚喪慶祝。率長兄當之。次兄遂鮮交遊。既考應封。同年有五人。時肅邸尙未襲封。同授鎮國將軍。肅邸有才識。睥睨傲物。鮮所許可。以兄與世無競。潛心學問。一見遂相莫逆。兄嘗過肅邸居。主人未出。兄持案頭摺啓閱之。閱未竟。主人出。謂兄曰。能讀此否。兄曰。或能讀之。兄讀訖。主人大笑。其放縱不羈。有如此者。兄述宿西山香界寺詩。至晚風起天末。木杪白雲輕句。主人否之。執筆欲代擬修正。甫吟空堂二字。兄笑曰。空堂欲二更耶。復相對胡盧而罷。至是。隔院居。頗相得。初肅邸之返自山西也。寓遂安伯胡同奎宅。賃屋以居。其府在正陽門東。頗壯麗。爲洋人據以避攻。董福祥攻取之。肅邸歸。無以爲家。賃是宅。并內眷府屬而居焉。前巷一叟。翰苑人也。名錫鈞。號聘之。人頗梗直。有氣骨。通文學。圖書滿案。日手一卷不釋。與肅邸舊相識。一日忽有

家人報。後垣有多人拆毀。禁之不可。驚詢之。乃肅邸因隔巷往來不便。使人毀垣。又以聘老舊家。或多避忌。故不謀而爲之也。聘老遂就毀處爲門。以通往來焉。兄既養疴於奎宅西院。聘老亦時通問訊。兄患胃病。終日臥不能起。飲食亦少。時使人往候。先考起居。一日忽肅邸張皇入。言聞之市人。云西城定王府某王子。因團匪事爲洋兵捕去。概指長兄也。兄大驚。泣不止。肅邸笑曰。事尙未明。何躁乃爾。卽使人歸。始知流言有之。尙非事實也。兄久病。冬盡始漸瘥。肅邸謂之曰。余始至山西也。日與凡夫俗子伍。悶欲死。旣歸。得芳鄰。爲之一舒。惟聘老人誠篤。家學淵源。長於守舊。不通外情。識多迂腐。今得君如暗室明燈。何快如之。抵掌談時事。多所契。時端邸雖獲罪。溥隽尙居儲貳。論者多以爲病。比有回鑾消息。肅邸論及之。余兄曰。溥隽必將廢矣。肅邸曰。何以知之。兄曰。當軸巧於趨避。獨免於禍。端莊等甯無後言。溥隽不廢。甯無後患乎。况聯軍公敵之子。何能認爲中國儲貳。以周旋於槃盪間也。無何。

兩宮至河南。溥雋歸宗之。旨下。肅邸益佩其識之遠。兄愈。時回余等寓所。定省後。共座笑語。復得團聚矣。肅邸之東歸也。本有崇文門監督之命。時地面尙未交還。無從任事。至是始有設署之議。肅邸時巡查各口稅務。輒携多客。必約兄同往。知兄之一寒至此也。欲以稽查十三門委員缺俾之。月可得數千金。兄固辭。強之不受。曰。余少不更事。素餐非所願。苟有事見使。勞何敢辭。不願任差也。乃止。



記兄司權務事

肅邸之任崇文門也。奏委陸鍾岱。本其世交。幹練有爲。惟涉世久。未能免俗。於權務規畫井井有條。而一二私人。多假以取利。副監督敬信之奏委惠某。久在部曹。與世浮沉。無所可否。肅邸喜維新。莘莘學子。留學歸來。多投之。輒使稽查前門洋稅事務。各生留學久。見崇文門權務腐敗情形。大詫。時訴之肅邸。肅邸輒然之。驗貨鳳某。邸之管事官也。爲邸中最有權勢之人。肅邸任之。而知其不足信。因酒稅事。與奏委大衝突。作烏鳶螻蟻之爭。學生輩乘之。肅邸不能爲左右袒。乃囑王君善荃。力勸兄任堂委。清理權務。兄執不可。肅邸忽入拜曰。卽請任事。無多言。兄難之。旣而曰。家嚴性恬退。余輩偶有進益。輒爲之不懌者累日。茲事當歸商之。苟許就。敢固辭乎。明日稟於先考。先考曰。曩不欲爾輩與世角逐者。以家足溫飽。世衰道微。徒自苦爾。今肅邸實心任事。興利除弊。引爾相助。予何靳焉。歸報肅邸。肅邸大悅。又明日乃同往權署。兄幼習於靜默。離

塵絕俗。一旦與俗子伍。日事勾稽。頗苦之。既而曰。余生何境不可處耶。有不可處者。是余學識之不足耳。乃早起先人而至。日處灰塵污垢之叢。喧囂雜沓之場。握管持籌。指爲之腫。散署動至夜九鐘後。晚餐尙未進也。久遂安之。肅邸患岑寂。嘗謂兄曰。務上穢污若此。君終日坐困。甯堪之乎。兄笑曰。旣任事。則但識今當爲。遑問向所由耶。概亂後。務上面目一變。往日積弊去其大半。書票驗秤。皆委員自爲之。時法紀蕩然。奸商勾串外人。挾私貨以抗關稅。員役交鬩。動成交涉。正陽門設委員若干人。率通東西文者充之。丁君士源。陸君宗輿。羅君肇燧。治君格。祝君書元。十餘人。皆當時選也。德商祁羅弗。以供使館用名義。尤抗稅。屢來照會。輒危言聳聽。時庚子敗後。無敢開罪西人者。權署獨不屈。後洋商終無之如何。丁君士源。爲人所構陷。臨記商人某。控其索賄若干欸。肅邸知出自奏委惡之之故。欲不問。以副監督處。亦有後言。乃囑兄會兩處委員。當衆訊之。兄求其證。皆子虛。力言丁君無罪。事乃白。無何。修稅則。丁君欲加瓜子花生

稅。至數十倍。兄不謂然。問其由。丁君曰。茶館酒肆。穢污狼藉。遍地皆此物之殼。此以不禁禁之也。兄笑曰。君爽直若此。宜得謗之速。如此。則論者將以爲他物稱是。西安聞之。將易監督。則權署之成績敗矣。乃止。肅邸力求整頓之方。使人四出調查關稅。兄任往南口查稅之役。十一月初九日。衝寒北行。值大風雪。後寒甚。至關。檢舊章之苛細者。多所更易。復策騎行山澗中。覽居庸關之勝。關刻石象甚精。且多奇字不可識。路中查出一局所。爲權署冊不載者。概崇文門自百年前。卽委之吏役。坐享其成。無過問者。一旦監督委員著意整飭。百孔千瘡。遂盡露矣。峽中孔道。卽

兩宮西幸所經過處。夜宿逆旅。有詩題壁云。邊塞寒威入夜深。朝來積雪遍城陰。山狂谷狠風吞吐。被甲衣鏃氣凜森。北去忍尋

西幸路。東歸期。聽中

興音。撫今追昔傷何已。百尺懸崖試一臨。比歸。適密雲縣稅局有稟至。委員穆姓。午甫接事。夕吐血而亡。肅邸委人繼之。無敢應者。初。稅歸權署書吏某包辦。

年交五百餘金。地處萬山中。不勝豪強侵蝕。久之。賠累不支。不得已。請改歸委員經理。肅邸派京中人任之。皆辭不敢往。因憶曾奉命往白龍潭求雪。路宿是處。識一開店者穆姓。人尙開豁。識文字。以是局委之。卽吐血而亡者也。本地人且不得任之。訛言愈甚。視斯缺若蝮蛇之不可近。兄見肅邸言斯地。卽居先曾祖定恭親王園寢側。有二護衛卽居是地。可遣之。肅邸悅。卽日授之。半載。收逾額一倍。肅邸以其半給之。會亂定。日本有交還警學權之事。時有兩宮回鑾之消息。而當日頑固之執政輩猶在。洋人之勢力旣張。維新人物乘之。任事之人。恐兩大之難處。不肯受。乃推肅邸充之。遂有工巡局之設。肅邸之任。管理工巡局也。實接自日人川島浪速之手。川島繼橋口勇馬。管理京師全城警務。聲譽日重。人極公平。設學教練巡警。分初等中等高等三級。聘巖谷諸日人教之。八旗子弟餉斷。陡失衣食之資。多往依焉。留京王大臣。設協巡局接事。以新舊相忤。川島抵抗甚力。肅邸喜維新。所任多通時務者。與川島感情漸

洽。川島感之。倡派人赴日。考查警察土木之議。肅邸委兄任此役。已乃偕川島。五月十一日。由京起程。川島外。只携一學生陸生宗輿。一典衛席珍。遂東渡矣。

記兄自記赴日本考查土木警察事

東行日記載壬寅舊曆五月十一日卯刻。余起行。午正二刻至塘沽。時虎列拉流行正盛。京師死亡相繼。既疫少退。津沽遂爲集重之地。津人往盛防避疫者數千家。余適經此。擬不下車。故直往塘沽。塘沽市肆。遍地均撒粉紅藥末。其危可知也。乃原訂招商局小輪船。因風大不敢起碇。坐待至酉刻。始登日商小輪。均升坐船頂上。比出口。日已沒。風又大作。船側欲覆。舟中人盡眩。不能興。忽雷雨至。電光燭燭不已。欲下歸艙不得。幸雨點尙疏。惟船向左側愈甚。時行李盡在船左。典衛席珍懼。強起。由梯下墮船面而昏。寒雨洒面始清醒。船至洋面寒甚。非綵絺所堪。乃以毯束身上。猶凜然也。西人交互相持。以防墮水中。船之側甚也。既抵大船。衆喜。乃久之不能相近。詢之舟人曰。風大沙淺。不可登也。反輪回塘沽。比抵岸。已夜半。雨止風未息。籠燭不能熱。暗行泥淖中。深沒踝。入一德人所開旅館。支蓆棚。設木板爲臥具而已。當黑夜。舟抵大輪不可登也。衆悞喪

欲死。余斯時何獨不然。既而鎮攝心神。默誦蘇子安和之說。念遂靜。而氣亦舒。至宿所。一覺黑甜。不復知人間有煩惱事矣。次日復行。登相模丸。海天空闊。豁人心目。又次日到芝罘。前同那王肅邸兩至此遊。此來已第三次。故識一梁姓。在其別墅小憩。覺白沙碧海。風景依然。海灘石子瑩潤如玉。拾以歸。夕乘小舟登輪。回首見萬家燈火。倒映水面。上下通明。真半空樓閣上燈初景也。十四日。早起。見海水漸黑。四望無際。詢之。爲黑水洋。十五日。午後風起。船搖盪。余略眩暈。登船面少愈。十六日。到日本長崎。地在海中。花木茂密。青翠欲滴。上陸卽山坡。道上修潔如拭。人物秀美。風景清麗。古所謂姑射仙人。其殆是乎。俗塵爲之一滌。有詩記行。見餘痴生稿。適有一海關英人婦。年六十餘。來見。餽枇杷數簍。色白味甘。核亦甚小。初以爲日本產物。後始知携自洞庭來也。山有古寺。絕雅。苔蘚封戶。簷似極細木絲所積成。男女服壯古雅。迥異濁世。自此復起碇。北行。一日坐船而。船行大洋中。如車行沙上。平而極緩。四望轉覺天甚湫隘。黑水中。

計里器時時轉於海面。成白沫浮於水上。咕咕作響。寂寞甚。頗動故鄉之思。時時忘其身在船中也。抵門司。見有大島在海中。島上之屋。紫木爲之。如園庭水榭。一少婦掃垃圾傾海中。屋頂碧草芊芊。緣屋脊。修潔一如長崎。旣入門司。船行兩山間。風景奇絕。水中小島。長二三十丈。山居其半。山勢屈曲。山前一寺。山後爲茂林。眞几案間物矣。盡日行山間。兩岸人家。時遠時近。水清山秀。林木蒼然。古人詩。隔岸人家喚欲應。斯景有之矣。晚抵神戶。神戶領事來接。引至酒肆。常盤樓。樓精雅異常。院門以極細樹內皮爲之扉。入門。石子路婉轉而進。花木極密。樓數楹。盡去牕牖。垂湘妃竹簾。席地坐。有小几置肘下。食時。有侍女持漆盤膝行而進。自大門至樓上。一器一物。無一油污痕。初船之將至岸也。雨作。舟人云。霖雨已四五日矣。至是綠陰滿地。風雨瀟瀟。不知爲夏午矣。夕乃改乘輪車發東京。神戶距東京千五十里。晚發。次早見千里長途。洒掃清潔。道旁天竹多叢。少遠稻田綜錯。時有村落。率古色盎然。山徑紆徐。水流甚清。時正陰雨連。

朝。風景尤妙絕。到新橋下車。蔡公使及日本官吏均來迎。學生來者亦夥。遂宿中國駐日使館。時五月十九日也。計行九日矣。次日拜日內務大臣內海忠勝。內海一老人。鬚髮皆蒼蒼。身亦似衰弱。近守舊派。然人頗忠誠。許爲指導一切。又往見警視總監大浦兼武。年力正壯。有桓桓氣象。晚仍歸使館。明日往拜文部大臣菊池大麓。商聘理化教習事。初余之往日也。學部尙書張君百熙。囑爲物色理化教習。至是薦佐伯信太郎充斯席焉。少暇往內務部土木局。聽講土木工程。初。考查人員之赴日本也。率出多金。托當局爲繕就所查之件。俟辦齊。卽携以歸。內容若何。鮮有知者。賢者乘暇流連山水。結交文士。以擴學識。不肖者。則酒肉徵逐。貽笑東鄰矣。余之行也。賴陸生爲之先容。商之日人。每早八點聽講。所考查事件之精義。間有質疑問難。越午始歸。考查人員聽講。自茲役始也。始悉日人修路。不用汽碾。以地勢關係也。正在歸併五路車站。爲交通方便故。折新修公署。更易街道。官無經費支絀之憂。民無遷徙流離之怨。謀定後動。

又出之公意故也。余之東渡也。適學部遣吳君摯甫。紹君越千。榮君竹農。往日考查學務。先二日動身。路遇風雨迂迴。後二日始到。時共遊宴。以廣見聞。六月初三日。乃同往見日總理大臣桂太郎。總理笑謂余曰。將軍知余爲當年之義和團乎。余幼時嫉西力之東漸也。思手刃之。持刀奔美艦。傷幾死。由是悟徒恃力爭之無用。乃潛心入學。出遊歐美。敝國維新。僕始得盡力焉。又曰。敝國之遣人出洋也。實在貴國之後。不肖如僕。朝廷皆登用之。貴國何任學成歸國之學生。投置閒散。不一試之。俾其効力於國也。余曰。敝國地大人衆。比例之。人才尙不足貴國十之一。故收效較遲。今亂後風氣大開。將廣招識時務之士。非前日比矣。總理又曰。將軍知乎。今地球小矣。（意謂交通便而利害切也。）即此著手。已有後時之憂。將軍勉之。余遜謝乃出。至今思之。猶佩其見識之卓。接物之誠也。至大學堂。時溽暑將來。已放暑假。觀其醫科而還。時雷雨大至。聞四十里外。擊斃男婦各一人。初四日聽講後。午至氣衆台。見數人忙製一圖。即天氣圖也。

每日四次收集各處電報地方氣壓及寒暑之度。就其同壓同溫二線。繪於全國地圖。以測其未來變態。作天氣預報之材料。非一無憑藉者之所可比也。各國除德國外。無能若日本預報之精者。以平均計之。德約百分之九十七八。日約百分之九十四五。英以下則百分之八十餘矣。赴香島。晚歸。本日小暑而天晴涼如中秋。初五日。早晴明。如清和月天氣。日本春早而夏遲。故風景絕佳。午後往觀市役所。人民赴所納稅者。男婦絡繹不絕。怱怱覘覘。若知其當然。無勉強意。故司其事者人少而事理。無喧囂爭競之事。故秩序井然。余之東來也。午。前聽講後。午後輒觀覽各處衙署工廠。閑遊山水幽靜之區。一日散步上野公園。公園非園也。只一片平野而已。草樹蒙密。風景悠然。登小山四望。忽聞登登之聲。一窶人子。力作罷。登山坐。引領天末。怡然自得。若不知旁有異鄉人者。久之。起而去。概工人工作少息也。嗚呼。日本人民其程度如此。宜其興也。淳然矣。既往觀自來水公司。有大水池。水清且淺。沁人心脾。余常日往來於公署。觥籌

交錯。高談雄辯。接應頻繁。忽來此清曠之區。心目一爽。舊癖復作。不能自抑。即踞坐池沿。主人請入室謝之。蔡公使率隨員等立以俟。余不語不瞬。久之始悟其失。遂去。晚一女學生伊藤稻子來見。伊藤。下田歌子之弟子也。二十許。荏弱若不勝衣。後每晚必至。子初始去。一日携一女生來。云中國某名宿之子婦也。齒相夥。余以日間應酬。早復黎明即興。往內務省聽講。晚更接見此客頗苦之。雖生等莊重不佻。殷殷詢朝廷事。而日人風氣初開。女子解放。士大夫多非之。故余尤競競。一日川島來見。伊藤亟避之。余乃密囑川島。每夕相過從。不數日。伊藤絕跡矣。次日往觀三井機器廠。初八日早。余同吳京卿汝綸。紹君英。榮君勳。覲見明治天皇於鳳凰殿。考查人員。非朝命。不覲見。茲以中日親善。余爲皇族到日之第一人。故加殊禮焉。既入。隨進隨鞠躬者三。天皇握余手。勞問者再。吳君等立余後。暨鞠躬退出。小憩偏殿。殿以木爲之。壯麗雖不足。光潔異常。足下如履冰行。聞前有繙譯盧姓。跌倒莫能興。昇出之。光滑可知也。初。庚子之亂。

將作元旦。余夢有使余吟詩者。醒已忘其大半。只記末有句云。不如却作皇華使。五鳳樓頭看太陽。曾記於冊。至是。觀日皇於鳳凰殿。抑亦奇矣。概當庚申以後。庚子以前。王子無入政界。承使命往異國者。際茲奇遇。或有異感歟。抑亦天地間一種神秘作用。未可知也。初九日。再遊博物院。觀西鄉隆盛銅像於山王台。像絕奇。略似達摩。一見知非常人。嘗謂人有格局。像若何。其性卽若何。事業亦自隨之。成敗利鈍。非所問也。蘇詩。所謂古人雖暴恣。作事衆所驚。朱子見名僧像。所謂他那下。嘗有人。我這下。嘗無人。有味乎其言之也。初十日。早。往區役所。警察局。修實驗工夫。又往宏文書院。觀其教育章程。晚至華族會館。又赴近衛公約。在東洋俱樂部晚餐。演說甚長。十一日陰。細雨復作。余讀醫書。知有照骨電光之說。至是。乞川島問之。大學醫院。乃約往一觀。室甚暗。出一電球閃閃作綠光。以板隔之。板上敷綠呢。如寫字台面。試以手映之。骨歷歷可見。肉已若虛影。以匣。以目鏡套。以小女童胸腹。映之。均可透視。在實體。如骨。如五金。作深

黑影。餘則虛如烟霧矣。晚赴三井招。文部外部蔡公使均在座。聽舞樂。十二日。陰雨。赴橫濱正金銀行約。乘輪車往。座中有外部大臣小村壽太郎。文部大臣菊池大麓。警視總監蔡公使等。申歸。赴東洋俱樂部近衛公及長岡子爵等之約。席間彼此演說甚多。子初始歸寓。十三日仍陰雨。已而至內務省。考察警保局事務。午赴大倉喜八郎招。長岡席上賦詩。余和之。席散。觀大倉所集中土佛像。樓數楹。佛千百尊。大至尋丈。小徑寸。皆莊嚴羅列。淨無纖塵。轉勝於在寺廟。塵封蛛裹中香花供養矣。後此樓。大倉進入宮廷。其在日本。亦目爲大觀可知也。十四日仍陰雨。赴內務省。考查警保事務。午後歸。赴兩國橋龜清樓牛島之約。亥歸寓。十五日仍陰雨。仍赴內務省。考查警保局事務。午後歸。同川島浪速。岩村顯允。陸宗輿。赴香根。以考查木土聽講實驗。均畢事也。余之東來也。席間演說。不欲以虛與委蛇之言相酬酢。時舒胸臆。質所疑。以考求維新之利弊。東人多是之。乃由外部。使岩村繙譯。專司傳譯余言。且席上添設速記生。記余之

語。因是識岩村焉。岩村久在中國。人極安詳。口齒靈便。漢文亦通。余遂賴之。以增見聞。至國府津。易電車。戌正至湯本。宿萬翠樓。一日福住。途中忽雲開。富士山現。山高大似爲北京近畿所未見者。巔白色似積雪未消。山爲余久欲見而不得者。往富士見軒者屢。日日陰雨。迄不得見。今乃大快。有詩記之。見餘痴生稿。次日早陰。乘肩輿登山。沿路山光水色皆奇秀。山坡笹竹高三四尺。儼然竹也。而近草類。彌望皆是。已正至蘆湖乘舟。玩清景。雨漸作。申刻由另一路下山。晚宿宮下初月樓。一名柰良屋。十七日陰雨。乘人力車回湯本。申刻仍乘電車至國府津。易火車歸東京帝國飯店。十八日應各大臣招觀古樂。聲容肅穆。舉止嚴而有法。案頭列冊子甚夥。圖說並載。誠大觀也。試翻閱一冊。序言。大唐開成三年戊辰八月壬辰日。藤原貞至中土學樂等語。按開成。唐文宗之年號也。藤原貞來學樂事。新舊唐皆不詳。概史略也。又有秦王破陣樂。戴面具。僣僣而舞。亦有奇趣。秦王。則指唐太宗。樂則秦王破劉武周事也。唐太宗卽位。改樂名

七德舞是也。日人歲演此樂一次。茲以余等東來。奏明天皇。提前演之。午歸。至丸善書肆。購東文甚夥。其書雖多爲中文已譯者。然每於其精密深到處。輒爲中文所無。疑爲譯者所棄也。卽如地文學氣象一門。求如東文天氣預報論所述者。渺不可得。警察中偵探之方法。戶籍之勾稽。飲食之取締。娼妓之禁否。研求之法。皆有專書。徧徵各國現行制度之利弊。然後斟酌本國國情。如名醫之於疾。三折肱矣。宜其失之者鮮也。晚赴蔡公使晚餐之約。見銓參贊林。蔡公使誤信人言。日人多腿疾。以食日米之故。乃每飯皆用上海舶來之米。概日本仍我古裝。不褲而束以布。屐齒得得。步小而趨。若患腿疾者。人遂謂其不良於行耳。十九日陰雨。拜警視總監。商調查警務聽講等事。拜下田歌子。下田女供奉。深諳女學。倡西人學說。收女生甚多。皇室子女皆從之受業焉。惟東人風氣。尙不能盡開。士大夫多非之。諸大臣之論調亦然。又拜鍋島侯。侯一龐眉皓首之老臣。誠慤人也。午後至永田町。拜吳君汝綸紹君英。晚至借樂園就餐。園設饌

精美。一倣北京。榮皆中國之席。而價且較京爲廉也。二十日大暑節。至警視廳聽講。始悉日本有豫戒法。爲警察之一助。此法雖似與人之自由有牴牾處。然日人不濫用之。故其流弊尙無所聞。午正天始熱。日本天熱較遲。略似我南省氣候也。歸。劉生繼詩來見。既而同蔡公使赴正金銀行約。座中七十餘人。亥正往天文台參觀。余之所嗜也。家有 先祖遺欽天監刊本。新法歷書等若干種。及測天器具。故略知其學說。既抵日。思乘暇一觀天文台之設置。比同蔡公使至台。陰雲密佈。星月皆不可見。乃至室中檢星圖表。偶詢天文台長。北斗七星。圖志皆列一等。今第四星暗甚。久非其他六星之比。第四星究自何年始退其光也。台長粹無以對。曰否。皆甚明也。少時。檢一冊笑謝曰。適所答誤矣。第四星。自一千八百五十五年始暗也。向聞之。家君云。咸豐四年始暗。正相合也。既報雲開。乃登台。就遠鏡窺月。嶽崎不復成形。如山爲人鑿毀者。正月形半圓時。故也。鏡長丈有三尺。一人以隻手司其運動而有餘。以有機械連之也。窺土星。

光環二層。星若晴之在目。蔡公使駐日久。未嘗至台一觀。故甚訝之。余問台長。新查出地軸轉法。伊云。十四年一週。然不及半秒也。又問其地震事。云地震之事。例歸氣象台。近考其大動週期。約得三十年。現甫逾八年。爲期尙遠也。子正後歸寓。二十一日早。往警視廳聽講。午歸。未刻復往。視演擊技術。申正歸寓。發家信一封。考查警務。照川島君所擬次第。更增三條。以求完密。二十二日。仍赴警視廳聽講。午後赴近衛公約。遊植物園。二十三日陰雨。清理書籍。爲川島夫婦書遊箱根詩。未出門。二十四日由警廳歸後。赴紹越千姻丈約。往觀印刷所。見有湖北托印一元大票子。山東一兩票子。皆極精巧。此所立已三十餘年。直督正派人來詢章程經費。此中服役多女子。爲演救火法。工女循序避出。如列隊伍之有法。三分鐘時間。二千人已按隊歸室。秩序不亂。聞斯舉所耗之工值。已千餘元。光陰之寶貴。信而有徵矣。二十五日陰雨。往成城學校。及士官學校參觀。微聞昨日學生有至使館衝突之事。晚學生又至使館。詰問蔡公使。幾無

法收拾矣。二十六日早陰雨。著花衣補服。赴使館北向祝

皇上萬壽。歸赴紹越千姻丈寓所視疾。以所乘之車。送越千赴赤十字會就醫。二十七日早陰。往警視廳聽講畢。由總監引看演習救火之法。設木屋焚之。水龍紛集。動止有序。無喧闐聲。時已暑氣蒸鬱。揮汗如雨矣。午歸。同榮君勛赴本鄉之約。觀日人大海書大字。長尋丈。亦一奇也。申刻遊不忍池。池爲維新時。守舊諸人殉身處。故有今名。晚晴。入夜星斗燦然。纖雲盡散。匝月所未嘗見也。二十九日早陰雨。同日警員。調查日本橋。本所。淺草。三區警查分署。以聽講畢。習實驗也。雨入夜未止。三十日早大雨。午不止。辰正調查神田。本鄉。下谷。三區警察分署。調查原氏出獄人犯保護所。又往上野派出所。調查管理法。本日之雨。爲到東京後。始見之大雨也。代學部與日文部訂教習合同。以昨晚接寶瑞臣函云。張冶秋尙書已承諾也。晚長崗子爵來留供餐。談終夕始去。七月初一日早陰雨。午漸大。調查麴町。芝。品川。三區。品川檢果品。凡未熟及腐敗者均禁售。

實吾國所未之前聞者也。晚赴長崗約。長崗。明治初維新有名之人也。今老矣。席間論中西學術。余以醫之一道譬之。中土務高深。多形而上之思。西人求具體。多徵實驗。久之。中多蹈虛。西或陋耳。長崗以爲知言。初二日早陰雨。午霽。參觀市谷監獄。午至熊吉樓午餐。未刻參觀巢鴨監獄。中有一女子。曾爲殺人事。監禁十五年。該女子風致嫣然。殊無憔悴之容。女爲日本有名之美人。限已將滿。行出獄矣。監獄署犯人。赭衣操作。無怠容。概勞則思善。法之良者也。初三日天已晴。大熱。非復前時之比。時距立秋。僅隔一日耳。而熱始酷。計北京年年此時。正陰雨連綿。熱方減也。已刻參觀司法省。見有因民事控訴案。裁判所審判官皆著古衣冠。戴紗襪頭。大領長衫。無懈容。無驕態。又有一刑事案。則一十九歲婢女。爲其主人送究。謂其盜去洋元六角七分也。又一男子。約二十歲外。因用僞銀券九角。判重禁錮四月。罰洋元四元。誰謂新律寬也。午正赴下田先生約。申初乘火車往橫濱。赴商會約。路見中國商人自成村落。惟院落不大。復以

板壁隔之。殊形卑瑣。亥歸。初四日早陰小雨。辰正往王子造紙廠。參觀廠演失火救護退出法。與印刷所所見略同。在扇屋午餐後。午正二刻由鐵路往日光山一遊。在宇都宮換車。酉正二刻至日光。寓小西別館。按日光距東京三百餘中里。橫斷島國。距海較遠。山水之奇。又非長崎東京之比。真古人畫圖高妙處也。初六日早雨不止。午後至東昭宮。宮爲德川將軍家廟。倣古唐宮殿所建者。繪有狸奴。爲日本好古家之所珍。至警署。見有每日電東京風雨寒暑燥濕雨量等日記簿。檢簿。自西七月一日卽（六月初三日）至此。計三十四日。無日不雨。只得一日晴而已。警查分署司晴雨之報。概附屬機關也。初七日已初入山。經含滿淵。水作淺綠色。寬數丈。平鋪道左。山路皆大石。平如砥。亦作淺碧色。兩崖壁立。老樹倒垂。時時有水滴下。景已奇。乘人車。一推一挽。漸升漸高。路旁巨石。人言由上崩落者。路經華巖瀧。瀧長七十餘丈。飛流濺沫。轟轟如雷。不可向邇。雲來遮之。時隱時見。真矯矯白龍也。午正至中禪寺。今名中宮祠。祠在萬山

之中。宛轉登山。至此實得二十四中里。非妙高峯轎夫虛報里數之比也。而寺前湖水清冷。泛舟其中。不啻神仙中人矣。華巖瀧。卽此湖之尾閭。聞湖之源。距此尙遠。足尾銅鑛。卽在此山中。以不克久留。未能往觀。歸路至一亭。在懸崖上。四望皆瀑布。景亦佳。戌初回小西別館。晚作第六次家書。有長短句。所謂聞道新晴開閨門。一川風物染秋痕。故園今夕負金樽。云云。（見餘痴生稿）卽此時作也。初八日小雨。已初仍由鐵路回東京。未刻雨愈大。時被水災之處已多。久雨亦偶然之事。非年年如此也。按風雨爲風穴所來。大旋風。有中邊之別。旋風之路。以四圍關係。若久不易位。則旱澇分焉。旱則大熱。澇則寒矣。本年日本適當大旋風中心進路。雨多而寒。中國正以距旋風中心較遠。旋風久不易向。旱而大熱。後歸查家人所記之法倫寒暑表。六月初四日午後熱至一百零十度。向所僅見也。斯時正余冒雨來日光時也。初九日早陰雨。會客數起。文部所薦之佐伯信太郎來謁。年三十七歲。鬚已于思于思矣。申刻往文部。內務部。參謀

部。警視總監。小林光太郎君。伊澤修二君。六處。晚赴外部之約。初十日早陰。至文部。內務部。警察廳。長岡諸君處。辭行。長岡留看兩國橋巡警彈壓烟火之成績。乃久雨成災。兩國橋爲水冲斷。長岡宅左近。已成澤國。不克舉行。長岡仍留待晴開。余初來時。只携五千金。至是已將用罄。不得已。謝之。晚在帝國飯店。約外部大臣小村壽太郎。內務大臣內海忠勝。文部大臣菊池大麓。外部總務長官珍田捨己。公爵近衛篤磨。子爵長岡護美。警視總監大浦兼武。土木局長田邊輝實。警保局長安立綱之。警視廳官房主事管井誠美。及四部長。三書記官。技師。秘書。通譯等二十餘人。晚餐。席間暢談。情意殷渥。子正始散。十一日早陰。警視總監來拜。赴宮內大臣等處辭行。來送行者踵相接。蔡公使約午酌。時紹越千姻丈已病愈。約同歸京。初。吳摯甫。紹越千。榮竹農。三君之來東也。以學部之委托也。乃來時。正各學堂甫放暑假之期。欲循考查習慣。托文部代辦。文部不可。曰。鎮國將軍且聽講也。君等何可不一深研之。三君亦不欲假手於人。乃

仿余聽講之法。後又留吳摯甫。待陽歷九月入學後。習實驗。榮君先歸。至是紹君乃同余內渡焉。

十二日早陰。卯正起行。日文部大臣。警視總監。土木局長。各部長。外務省。內務省官。銓參贊。均來車站送行。蔡公使托病未到。概學生風潮正盛。懼爲所劫持也。余之行也。陸君勸乘午車。以過早則送行者多不能到。余笑曰。來時中途以黑夜埋沒風景不少。歸路需補觀之。吾不欲以虛榮易之也。乃發。道中風景多爲來時所未見者。亥初至西京。宿柘屋旅館。余由東京之來也。警察欲派人來保衛。且備西式旅館。余欲覘東洋之古風。且安於頽放。辭之。茲旅館。則日本式之樓。古雅無倫。四面青山。盡來座右。洵勝地也。街衢盡水。云薄暮雨甚大。十三日晴雲。早起推四面窗板。如坐一亭。緣日人之屋。純以木爲之。適居屋上之屋。四窗皆係木板。推之納四角立匣中。儼然一亭。屋中皆席地坐。如入畫圖中也。晚睡卽在地板上。有被如衣。領袖俱具。其長如被。論語。布必有寢衣。長一身有

半。是也。禮失求野。茲亦一證矣。未識好古家見之。以爲何如。午後至太極殿。境極幽僻。坐久之。始出遊桓武天皇廟。又至清水寺。寺居林木深處。泉水潏然湧出。誠清幽之地也。禮佛者踵相接。寺在山半。亦足登眺。向夕始歸寓。登樓四望。燈火如列炬。更有排列成字形者。西北一華表式燈數百盞。少北一大字。又一船式。大字一橫。長三十八間。卽二百二十八中尺。擎長八十五間。卽五百一十中尺。捺長六十間。卽三百六十中尺。船式燈船高十丈。圍五丁。艙至舳。長八十丈。船底至帆柱。高四十三丈。此風自延德元年七月六日。追悼相國寺橫川和尚。足利義尚始也。時日本久行西曆。而一切俗例。輒隨陽曆行之。亦一奇處。此次之燈火。正賀中秋節耳。十四日早晴。已刻游本願寺。登豐臣秀吉飛龍閣。閣古迹也。寺法主二。新舊各一人。舊法主抱病久不出。新法主則游英未歸。只晤其演教局長某。及和尚大洲鐵二僧。接待殷殷。臨行出帖二冊相送。且言正經營五洲學堂。欲遍傳佛教於環球也。出寺。至嵐山午餐。乘舟循溪水深入。日夕

乃歸寓。十五日早晴明。午訪豐臣太閣墓。墓高五百餘級。洒掃潔淨。極爽心目。奉神者。加藤某。年六十餘。人頗誠篤。與之談。尊儒重道。儼然一讀書人。頗以平生未至孔林爲憾。出蕨薇敗醬相示。云好研究植物之學。且以詩稿相贈。以工夫茶相餉。茶綠色。碗中只見泡沫。飲之若虛。其初烹也。在客前自持乳鉢研茶葉極細。烹時舉止有法。進茶時如供獻儀。舉按齊眉。極肅穆恭謹之容焉。晚乘觀月列車。往龜崗賞月。路只三十餘中里。而穿山洞者八次。境奇險。穿竹林。竹森森高十餘丈。黑暗不見星光。入山。月傍峯頭明甚。晶瑩四射。不堪注目。至龜崗。游人極夥。子初歸寓。十六日天極晴明。到日後所僅見也。午後乘火車至大坂。觀築港。到時先觀型模。繼登樓望其全勢。又乘小火輪周歷港內外觀之。港原估八年竣工。今方興築五年。工已逾半也。晚乘火車發神戶。至三ノ宮下車。領事某率衆商人相迎。縣知事服部有公務。遣其屬掘內迎候。領事導往中華會館晚酌。衆商人之意也。會館軒廠清潔。較橫濱爲優。十七日早晴昏午至西

常盤早餐。熱甚。時距處暑方四日。而熱爲北京所僅見。來日後所未有也。概其熱如夏五。而有伏日之蒸鬱。任爲樹陰屋背。均不可避也。余胃病因之作矣。至布引瀧一觀。亥歸寓。十八日午。束裝歸。登立神丸。船有搶木。遇風不搖。午正開行。勉強書大字三十餘紙。狗日人請也。十九日已正。至門司。時聞中土霍亂症方至門司。故擬不停輪而過。乃甫至此。機關師忽吐泄并作。船不能行。衆皆危之。英人尤懼甚。云須需電東京。始有新機師來。衆益懼。酉初。船主商借已停他船之機關師。遂開行。小雨又作。虹見。下端著海中。古人所以有蜃樓之說也。回望三島。黑暗沉沉。當又有大雨矣。余茲行甚利。惟來時擬避疫。經塘沽阻風。反宿於其地。今歸。又船舶門司。避疫。幾成迎疫。亦一奇也。幸從人未有染之者耳。行未久。經朝鮮境。山如焦土。鑿損山骨。彌望皆如此。較日本之山若樹堆者。不可以道里計矣。興衰之迹。觸目卽得。固不必至漢城。已可知矣。二十日行大海中。一望無際。二十一日仍行大海中。二十二日至芝罘。余病未愈。又無船渡津。

暫寓烟台。待招商局船。旋肅邸電。余已有

旨著候補五品京堂矣。余之東行也。知崇文門以收稅逾額甚鉅。將開保案。余以世爵例保侍衛。非余所能勝任。曾力辭。且請肅邸保時無列薦劾。以免進退維谷。非徒無益而害之也。肅邸諾之。乃行。至是始知肅邸一再與當軸接洽。故有此文職京堂之命。殊可感也。二十四日船始到。晚登輪。風起。船身搖蕩。次日抵塘沽。改乘火車歸矣。以上略錄兄赴日本日記。其東行大略具見此篇矣。

記兄任工巡局監督事

方兄之東行也。肅邸委之充工巡局總監。而以副監張柳代理之。張君久充幕僚。於公事熟悉。非鹵莽滅裂之比。惟涉世久。習於揣摩。以官爲家。未能免俗。爲憾耳。

上之東還也。諸豪貴亦歸。守舊之儔勢復盛。而日人操京師警務之權。訖不少讓。張君介乎兩大之間。巧爲趨避以應之。川島之練巡警也。分三科。曰高等中等初等。初等卒業。卽補巡警。高等中等卒業者。卽任爲警巡巡長。執行職務時。有功過輒干涉之。張君苦之。乃以總監未歸。凡警務學堂卒業送局請用者。以候總監歸核辦遣之。而別募斯隸走卒充巡警。囑托逢迎。勢所難免。警務爲之一衰。兄歸。乃說肅邸。力行新法。凡非警務卒業者。均不得服制服。餉亦不得與卒業比。飭各局委員。待卒業長警以禮。不得視同斯養。禁刑責。時各分局總辦多陳人。協巡局之舊也。西北分局總辦某。責巡警。且不以道。兄怒飭之。調巡警

於總局。立獎之。某怒辭職。旋裁西北分局。歸併西局焉。警巡之初設也。分八等。以慎重名器之故。無至六等者。有一掌全局警務者。當局以其兄爲顯宦也。擢充四等警巡。而彼時尚未受高等教育。至是兄不以爲可。卽日飭調往西南分局。且囑遇選高等生時。送入警務學堂教之。惟學堂卒業候差之人。聞余兄之歸也。羣以任差之期相詰。兄乃往見川島。與之約曰。君君子也。以後學堂之權。君操之。以育警德。培警學。高其人格。地方行政之權。予操之。以一事權。而便措施。消防隊人。皆選自衆中。人品學問較優。予與君共監督之。何如。川島曰。將軍言誠是。然中國官場多腐敗。不重公務奈何。兄笑曰。今日以前工巡局。他人事也。今日以後。余任之。功罪皆所不辭。同行久。閣下豈尙視予等於餘子耶。川島笑允之。警權遂分。乃諭局員曰。學堂初等科卒業者。均准照學堂所定等級著制服。未有相當缺可補時。皆以三等巡警授之。中等科之巡長。高等科之警巡。皆如之。學堂與工巡局。遂無牴牾處。久之。不得意之徒。遂媒蘖其間。一日川島

有事相商。忽曰。與將軍處久。頗相信。惟警權之交還。人謂僕爲將軍所哈。何也。兄笑曰。人言無足恤。君靜思。予哈君否。川島思之良久。對曰。將軍實未嘗見哈也。一笑而罷。川島名浪速。東鄰君子也。初隨聯軍到京。寓東城大市街三條胡同恩宅。秋毫無犯。一日兵悞毀一木橙。川島乃召房主人。與之道歉。問索賠若干。罰其兵給之。時八國之兵分踞四城。擾攘無已。時聞侵占人所有物。無敢過而問者。今川島待人如此。愈感之。恩姓與余家爲姻婭。故知之諗。喬口勇馬之在順天府署理警政也。不通中國語。假手繙譯紳士。多爲所蔽。人怨之。喬口去。乃易川島。司北京警政。聯軍退。設協巡局。工巡分局之所由來也。紳士之中有瑞某者。平日交驩川島。頗竊威權。及兩宮欲回鑾。大懼。乃約某某往見肅邸。告密。力誣川島有野心。肅邸大笑。謂兄曰。瑞某思以一身脫禍。負川島矣。後此公任總督。終以滑脫悞天下。悲夫。余兄之任警務也。於一切措施。多不循蹊徑。一時豪強斂跡。有行行且止之畏。一切

陋規皆罷之。又最惡要譽盜名事。當行者卽行之。讒謗皆所弗恤。久之。人皆畏而懼之。此非阿其所好之言。當時局中人既多親炙。除交惡之一二人外。在今日必有知之者。可以質之也。時當承平久。捕務懈弛。強有力者。以設賭庇匪爲榮。雖有三令五申。信賞必罰。無效也。兄乃自訪聚賭處。飭分局總辦自往勦之。王公府第之設局者。一時斂跡。有溥十者。某貝子之子也。有設賭庇匪之事。彈劾之。囚於宗人府一年。有一宗室崇子後。廣交遊。獨不畏法。設賭局與西北分局對門相望。局中司法處委員。刑曹司員文某。怙惡不悛。婪贓無度。總辦畏之。轉恃以魚肉鄉里。所以前日有因抄賭得罪之巡警也。兄怒。飭捕崇某。終無敢捕之者。索之急。崇某乃寅緣肅府。趁演劇時以走票見肅邸。肅邸慷慨無畦町。遂得幸。一日忽跪地不起。王驚問之。傍人曰。無他。將軍捕之急耳。王大笑。謂之曰。將軍捕汝。我亦無能爲力。但不致由我府中捕去。若爾行街道中。須自小心也。崇氣沮。始閉賭局。文某終以墨敗。遂撤局差。初國家設八旗分二十四固山。

卽兵籍之制。滿蒙漢人皆入之。自庚申後。旗餉日減。生齒日繁。率皆貧窶。庚子之變。餉斷者數月。幸川島招練巡警。多應之。故內城巡警皆旗人。生計賴以少蘇。外城仍五城御史之舊。相形日絀。後亦照內城設總局以理之。兄建議推廣招募密雲小五處駐防。救濟無算。有勸肅邸添招客民。以消畛域者。又有勸肅邸改用上海租界管理法者。兄笑曰。旗人。滿蒙漢皆具。且有回子緬甸高勾麗俄羅斯人。何謂畛域也。今旗人失餉。無以爲生。徒要不分畛域之虛名。另募。何如因利乘便之爲得計也。警務之學甚深。外人管理章程。與其本國不同。簡陋不足法也。皆拒之。庚子之役。德國公使克林德死之。旣和。要爲克林德立石坊於就日坊北。外部任建築役。承修之商人古玩鋪掌櫃人高尙仁。善奔競。一日石工聚賭於通衢。禁之不止。乃大鬩。巡警捕之。被毆傷。因並逮高。時已上燈。兄正由局將歸。乃飭暫禁押所。忽有奉宸苑文書至。視之。乃索放高尙仁者。首書承修。

慈禧端佑康頤昭豫莊誠壽恭欽獻皇太后儀鑾殿欽命要工商人高尙仁云云。後列慶親王大學士某某等十餘銜。兄閱之大怒。曰此宵小藉勢庇匪之慣技。不懲無以安閭閻矣。乃提高至。擲文書與看。曰毆警之事。是非曲直。明日訊爾。今杖汝爲此文書也。乃重杖之。置文書不覆。川島之操警政也。一掃舊日步營詐索閭閻惡習。對待人民以平和手段爲歸。兄接管後。力守斯旨。時有故習復萌者。輒罪之。雖分局長官多舊日官僚。陋風終難盡革。然與昔日管地面者。已有上下床之別矣。忽有建議歸併外城者。兄拒之。曰外城襲五城御史之舊。多南省京官。奴隸坊官。穢污街道。動以流言挾之。未可輕於合併也。內城極力整理。外城可暫聽之。徐圖著手。否則使我內城維新之萌芽夭折矣。乃止。又有以上海租界章程獻者。肅邸交局議。兄仍否認之。曰洋商之於租界。非其治國法也。因陋就簡。居留地之公約耳。何足效之。後復有以招民人充巡警請者。余兄曰。庚子而後。八旗生計奇窘。巡警之額有限。除老病殘疾外。盡以充之。猶虞

不給。旗人習於弓馬。奔走是其專長。又有底餉。雖少足以資其養生。化無用爲有用。因勢利導。未可更張也。或日後擴充外城。再議未晚。事遂寢。無何。肅邸太福晉薨。局事本可派署。肅邸以見嫉羣。小毀之者衆。當道遂易人。以那相管理工巡局事務。肅邸之管理工巡局也。擬設醫院講衛生事。欵到事未舉。暫存正金銀行。前崇文門奏委陸某。以公事欲挪用之。告肅邸。肅邸可之。使兄付之。兄取欵同陸君點交。匯豐吳某。又復與之約曰。一朝醫院立。必速歸趙。陸君與吳某皆諾之。未幾。局易人。兄見肅邸請索之。陸已出京。吳則百端支吾。不肯繳。肅邸固問之。吳僞曰。若王用。欵雖百萬何靳。爲况公事耶。但關毓某。雖一錢不可得也。肅邸問所以。吳又嚙嚙不能對。乃大惑。召局中支應處人。一一根究。無所得。不得已。問余兄曰。吳某何恨君之深也。且謗君爲不足齒。又不能言其故何也。今欵久不繳。局奈何。兄曰。欵事有余在。雖緩無害也。吳某遁詞耳。余何從索解。肅邸曰。君能見彼乎。彼言君不敢見也。兄曰。可。一日吳某正在邸座。報毓將

軍至。吳倉黃遁去。肅邸大笑。見兄曰。君事白矣。相與軒渠。後肅邸貸欸償之。當此未交之際。張副監柳。一面阻吳不令繳欸。更譖余兄於那相。又不明言其事。那相屢問余兄。兄神色泰然。但言欸無繆轄。有事。余任之。那相派故交錫君廉司支應。始明真相。甚哉。世路之險巇也。

記余兄爭王維勤案及李馬氏案事

工巡局自肅邸丁憂卸事。那相接管。當秋曹正極黑暗之時。局中有發審處。直接與秋曹有關。肅邸時。卽勉強維持。無所進步。概局案終必解部。部中賄賂情托。視爲固然。變易是非。捏造事實。恬不爲怪。動關吏議。無可解紛。故無敢整理之。憶不入八分輔國公溥元。有兄患花柳疾。家人薦一槍醫。診之曰。此非服紅礬不可。且自出紅礬一包。使服之。已而毒發。大呼醫生害我。灌救無效。遂死。案解局。訊之。醫曰。我以紅礬治此症。愈者多矣。問紅礬何在。出驗之。果信石也。乃送部。久而不結。忽有文書來。大加詰責。文稱醫云。所給服者。乃紅粉。非紅礬也。概紅礬卽信石之俗名。人所共知。刑曹巧爲開脫。改稱紅粉。亦不詳其紅粉爲何物也。乃嚴責工巡局以示威。其敢於舞弊多類是。那相有所畏憚。調刑曹有權司員汪某。來局辦事。汪人極貪狠。而驕蹇不法。到局。卽大作威福。副監和之。發審處。無敢持異議者。曾有撫寧縣案出。暗中關說汪某。旣成謀。乃訟之局。原

告李馬氏。同一男子。謂係姻婭。控王維勤殺伊一家。曾訟之地面官。不直。上控於道。於臬。皆敗訴。乃飭捕王維勤。及其子並繫之。那相囑勿刑訊。以案犯王維勤進士也。汪乃日以刑責其子。其子極荏弱。文士也。不勝楚毒。輒求免其父。一切皆自認之。汪不問其事實。但以刑求其畫供。余兄不忍聽其殘虐也。乃往見那相。三往三拒之。概汪有先入之言矣。兄乃但理警務。不問發審事。亦不忍問也。一日汪忽約余兄至發審處。云供已具。提一幼童約十餘齡。曰此殺人見證也。兄問之童。童哭曰。我何曾見殺人者。汪怒。卽杖之。但問應否。不應。又杖之。童皮破血流。乃畫供。兄拂袖去。無何。均解刑部。送時例應總監。以次均書押於稿。以兄之不直之也。乃不使署之。兄猶冀案到刑曹。或當大白。久之。案不具。汪乃大施運動。必置王維勤一家無少長均處死而後已。非此。固無以斷其家財於李馬氏。卽無以分餘潤也。無何。案具。王維勤凌遲。其子等斬。婦女遣。藉其家。給李馬氏。王家有名大戶。李馬氏及其所偕之訟棍。以貪得不厭。不肯多所分潤。

汪怒逼之。事頗爲人所聞。那相不悅。汪等乃假李馬氏名。爲局送匾。以杜人口焉。當以人犯奏送刑部也。汪張提王維勤子。以言餽之曰。爾誠孝。若按例。爾一家均當斬。爾果能到部後。一切皆承認。則可免爾兩弟死。使爾父有後。否則絕矣。乃叩首曰。一切皆遵命。但求免兩弟死。語訖泣不止。乃繕摺摺具。同事孫君視之曰。誤矣。原告初供稱死十三人。今何十五人也。汪乃去二人。其威逼利誘。擅擬口供也如此。余兄嘗嘆。刑曹固黑暗。予何敢與之抗。然得財足矣。何至殺人。殺人足矣。何至殺人一家。且至凌遲以謀人之產。天理絕矣。予何能忍也。久之那相亦頗有所聞。會又有一李馬氏者。投汪關說。汪思乘機詐財。爲之布置之。憚於人言。呈到。伊反不來局。那相收呈後。電局副監應之。那相不應。仍覓總監來。囑勘虛實焉。余兄立提李馬氏訊之。氏抱一幼子。甫五歲。歷叙御史李灼華爲其鄉親。伊翁來京寓李寓。一日李請其翁談話。勸其回籍。翁不應。李出茶。色極綠。強飲之。歸室卽吐血而死等供。且嗾幼子供李凌虐狀。子極伶俐。屢曰。

肋條折了。肋條折了。余兄察言觀色。覺其僞。乃趁其供畢。同座撫慰之。之時。突曰。李馬氏。爾供具矣。案必開棺檢驗。脫無傷。且事子虛。則死者爾翁也。卑幼誣告。累及尊親。爾罪且至死。不可不慎也。李馬氏驟然聞此語。吃吃言曰。傷不可知。毒亦不可知。同坐小汪委員。汪某之姪也。人尙坦白。卽以手暗推余兄。使之注意。余兄笑頷之。明日堂期。那相將來局。汪某亦來。與張副監等切切私語。無何。那相來。張等力言案已訊明。實係李灼華殺人。請嚴究。兄不語。那相問之。余兄曰。僞也。遂叙其狀。且曰。小汪委員。當時推予注意。可爲證也。小汪無語。那相悟。乃使送刑部。不復訊。亦不復入奏矣。後刑部訊屬子虛。坐誣告焉。兩案皆李馬氏。李灼華案。非兄力持正義。不蹈王家覆轍者幾希。汪某之惡通於天矣。汪張皆銜兄阻其計。值余兄降一巡長。乃嗾使控兄多欸於那相。那相使其故交錫君廉密查之。事盡虛。乃斥革之。兄適升閣學。乃乞退。那相不可。使人固留之。乃復視事。昔蘇東坡詩。所謂殺人無驗中不快。此恨終身恐難了。云云。千古一

轍。良足慨矣。

記兄任宗室覺羅八旗中學堂總教習事

余兄之初任工巡局也。舉重若輕。肅邸更譽之不已。漸爲世所知。報館輿論多右之。張治秋尙書司學務。提倡新學。惟當尊儒重道學說盛行之時。耆舊多挾以便私圖。無能出其窠臼。乃聘兄整飭宗學。時寶君熙。劉君仲魯。喬君茂萱。同受托。議改革。兄倡議裁併各學。立宗室覺羅八旗中學堂一。小學堂四。冶野尙書許之。聘兄充總教習。喬君樹楠副之。寶君熙充總辦。劉君若曾副之。文君斌充提調。兄以工巡局事極繁。辭之不得。乃封存月薪於支應處。盡義務焉。有歐陽弁元者。留學生也。張冶老器之。登台演說教育事。多新說。衆贊之。兄繼登台。略謂教育之事。中土聖賢相繼。五千餘年。教育一途。自非不講。惟人道敏政。地道敏樹。爲人上者。苟一時不注意於此。則民散矣。歷代喪亂頻仍。已有補苴罅漏之不暇。況時移勢殊。疆土日闢。全球大同。君治民治法治。國殊其政。治之之術不同。求治則一。新學說立。舉國之士。人雜言厖。莫衷一是。惟人民程度皆足

語此。始可擇善而從。否則亂矣。欲我國人民程度齊一。非普通教育有效不可。余嘗曰。我宗室覺羅八旗學堂。培養出一二有學問才名之士。非功也。使我宗室覺羅八旗之人。人人有普通學識。推而至於非我學堂所屬之人民子弟。間接受普通學識之益。備提高一國程度。是大功也。此論治老尤偉之。後同寶熙等接收八旗各學。各校皆蔽陋不堪。室中濕潮之氣觸鼻。概間隔皆磚墻也。爲易以板壁。潮濕頓止。後余家舊日六行之潮濕者。卽依此法去之大效。其法得自茲役也。各官學有割售鄰家爲菜圃者。其廢弛可知矣。久之。學堂始成立。余兄欲掃除一切舊規。別立新矩。用新人。倣日本制。創一學堂。而不勝舊人之反對。同事之排擠。知無可爲。乃納還二年之薪金。奉身而退。

記兄任鴻臚光祿內閣學士時事

余兄之任鴻臚寺少卿。殊遇也。咸豐以前

天子當陽。用人無方。各將軍多由授職時。卽以侍衛授之。不久。文補閣學。武任將軍都統副都統。出任封疆者有之。自恭忠親王攝政。一守成例。凡簡自

帝心之舉。均無從出。輔之者。漢大臣不問滿事。滿大臣又不欲干涉宗室事。遂自同治元年迄光緒十三四年。無一授職後任事者。王公子弟既不能就部曹爲小吏。又少奧援。俸屢扣減。不足以糊口。多有宵小引入地痞之流。包庇匪人。以謀生計。良懦者。不堪其苦。人遂謂將軍爲一種無告之民矣。今肅邸善耆。既授職。無所事事。乃力圖之。始得授侍衛。後遂有繼之者。然文職無之。文職之授。仍肅邸之力。余兄爲之先導焉。兄任鴻臚少卿。一年九月。無甚事。冷署堂司。貪鄙形狀。殊可笑。亦可憫。初肅邸開工巡局保案。欲將余兄請作爲候補三四品京堂。兄執不可。乃改專以四品京堂候補。概兄性剛。不欲聽人支配。三品之說。

乃副監督張柳所主張。希兄得候補三四品。伊可保四五品京堂矣。故兄辭尊居卑。不甘被人侮弄。甯願受此不利益也。摺將上。會某御史有嚴核保獎之奏。中止。適國家正修武備。政務處王大臣正議編定新軍三十六鎮。余兄聞之曰。是有利害之可言矣。乃上封事。略謂各省駐防原爲八旗勁旅。分駐各處。彈壓地方。自庚申後。添招勇營。駐防久閒。幾厭兵事。坐耗廩祿。等於贅疣。比議編練三十六鎮。廣招土著。不如因利乘便。以各省駐防兵丁訓練充補。就原有之人。原有之餉。少事增添。節省既多。又化無用爲有用。是一舉兩得也。況農夫笨重。訓練不如八旗子弟。習於弓馬。事半功倍也。事下王大臣。多不謂然。乃以聊備一格。准八旗查照地方情形處理之而已。後值光祿寺正卿有泰。放駐藏大臣。遺缺出。玉恒補之。明年原案上。肅邸仍以三四品京堂保之。秋。玉恒以疾辭職。候補人中。兄居第三。前二人適有參案。兄乃補光祿寺正卿焉。是亦有數存者。其信天任運之效耶。兄之任光祿卿也。甫上任。良醞署署正謝某。卽以內務

府索武英殿修書匠役供給肉斤稿呈畫。兄不可。後謝某一再請。乃使駁之。概武英殿久遭回祿。多年無修書事。更何匠役肉斤之有也。久之。文書不出。兄促之。一日早起。忽署正恩榮來見。衣服襤褸。人亦頹唐。見時。戰栗不能自止。吃吃言曰。將軍囑行內務府之文。張大人云。不用辦。余兄見狀。笑曰。爾爲人舞弄矣。謝某何不來。曰。病矣。兄曰。張燮君。余夙知之。誠篤君子也。何能有此言。此不過滿員多不學無術。相襲成風。故易受侮。予非其人。鼎鑪有耳。謝不聞耶。使汝來。無他。試余之虛實耳。禍則汝受之。事濟。享之者謝某耳。恩榮索索欲抖。問其謝署正每年分爾餘潤若干。曰。二十金而已。笑遣之。囑其明早同謝來見。次日榮謝兩司員同來。謝果稱昨因患病未能來見。曾見張正卿。回行內務府文書事。張堂云。將軍既囑行內務府文。速行之。無不用行之語。或書手傳言誤也。余兄笑曰。爾技倆只此乎。我昨日固言之。爾故爲嘗試我也。若隱忍受之。則爾計得矣。我若不受。則委過恩榮。恩榮委過書手。引一乞丐杖而枷之。其事結矣。我非

可欺者也。正駁詰問。張燮君至。事乃大白。謝某面赤如火。余兄必欲叅之。經大官署署正等緩頰。乃咨部記過焉。異日該署歸併禮部。張君任禮部侍郎。獨囑謝某不得入署。卽此爲也。值祭先農壇。光祿寺走福俎禮。余兄以初執祀事。欲從下祭襄禮。此次仍由少卿慝本。宗室且姻婭也。托病不行。要贈五十金。始可行。余兄怒曰。慝健堂。固姻婭也。窮可助之。未可作賈人態。必須銷假到壇。福俎。余自執之。毋庸其過問也。乃自執福酒。張君執福胙。如禮。事後餽慝健堂三十金。曰。此爲姻婭故也。慝亦赧顏受之。滿員固有學識優長者。然貪得畏勢。志氣懦弱之儔。往往爲司員所侮。同寅所輕。卽此類也。無何。余兄升內閣學士兼禮部侍郎銜矣。

記兄升巡警部侍郎事及入陸軍學堂聽講

余兄之升任巡警部侍郎也。以吳越炸五大臣於火車站。朝廷建設專部。使徐君世昌整理警政始也。工巡局自肅邸丁內艱卸事。那尙書桐繼之。未幾。炸彈案出。改設巡警部。收外城歸巡警部直轄。徐君世昌補尙書。余兄與趙君秉鈞補左右侍郎。初那相之接充工巡局監督也。多主調和新舊。少所建立。而所任之人。率多不稱職。遂爲人所乘。徐君雄才大度。剛毅有爲。內城事。仍托之余兄。外城事。則托之於趙君秉鈞。以張元奇錢能訓延鴻吳廷燮等充丞參。規畫天下警務。議設警官。余兄力持必作文官階級。以議者欲以參游都守位置之。蹈步軍統領衙門覆轍。兄曰。武弁久爲社會所輕侮。參游都守。習於卑鄙齷齪。一旦以此名之。則數年之功墮矣。執不可。乃設文官。議者又欲以六品爲極。兄言於徐尙書。乃以四品爲之長。退而語人曰。我非爭巡警之官階。爲保持其人格也。我之任工巡局總監也。厚巡警之俸給。尊其身分。巡警有所關白。我未嘗不

正容接之。立而與語。委員有慢之者。斥之。巡警有自薄者。懲之。言出法隨。從無反汗。一洗舊日殉情枉法之習。以故有所懲。無敢爲之詞者。惟遇事一再審慎。未敢掉以輕心。今設部。用人至夥。舊習相沿。尤易墮落。可不爲之維持地步乎。衆以爲有見地。會有熟於世故者。以巡警部之名。動關地面。時有革命之徒。日謀發難。脫有事。考成甚大。不如以地面責兩廳。改巡警部爲內務部。增司收入內務事項。如前工部所管各項。以爲言者。徐尙書商之於余兄。余兄不以爲可。錢右丞爭之曰。堂堂一部。以巡警名之。殊不稱。余兄曰。吏部卽司官吏事。何如。錢曰。吏非巡警比也。余兄笑曰。理兵事曰兵部。何如。錢丞語塞。全堂一笑而罷。後卒改內務部焉。余兄之任事也。專意刷新政治。甚惡利祿之徒。毀事以求私利。尤惡要譽沽名。媚世徇俗。常曰。十年培之而不足者。崇朝毀之有餘。十人成之而不足者。一人可敗之有餘。昔有巧對云。兩裏築壻。搗一堵倒一堵者。似之耳。士大夫不於一舉一措之微注意。集義而生。苟一舉措不當。宗旨亂矣。何效

之可言也。以故。與人動多乖忤。幸同僚雖多齟齬。徐尙書獨倖之。時得有所匡正。久之。同僚亦憚之矣。後徐君入樞府。夏令

上駐 頤和園。暫改在海淀公所辦事。間日一會。時余兄正以世爵同 醇邸等入陸軍學堂聽講。率午刻至煤渣胡同學堂。功課垂畢。急赴海淀堂期。散值。卽寓側將軍園。次早興。至徐尙書寓所。候其歸。詳陳內城警務情形。應與應革。從長討議。以堂期公所人雜言厖。部務正繁。無暇討論。故不得已。而出此也。在徐寓飯畢。急歸。入城不歸家。直往東城學堂聽講。晚始歸缸瓦市本府。計二日一周焉。人問其何自苦。兄曰。余之嗜學。慣性也。樂此。故不疲也。或又問其學之何用。曰。學卽是用。更何求其用也。教習王子山講西洋歷史最佳。曹燦三講算學。英文皆精。兄嫌講演時不能親切。輒於不往海甸日。散學後就教習室受課焉。學中聽講原分兩班。早班皆大員子弟。多不能守規則。午班雖亦有不能常到者。如堃公等。而 醇邸等則無日不至。兄聽講期滿。受聽講班文憑焉。後徐

尙書有同貝子銜鎮國將軍載振出差東三省役。余兄以左侍郎兼署尙書。適有蒙古某貝勒。家寒性庸劣。好與下流社會者爲伍。時禁私運軍械入口。海關稽查甚嚴。奸商挽某貝勒出名。以蒙地辦警察需槍械爲言。包庇之。陸軍部來問。司員某不待請示向方。卽擬覆稿呈畫。以函胡覆之。余兄怒。不畫。使痛駁之。司員某以爲大辱。幾僨事。概積習久。司員之權在書吏。堂官之權在司員。頤指氣使者。書吏也。尙侍之才者。賢者。保其名。不賢者。受其賂。無才者。仰其鼻息而已。能杜隱微之漸。操全部政柄之尙侍。不數觀焉。

記余兄襲封並在御前行走事

先王體素健。年七十有七。猶精神矍鑠。步履如昔。秋八月。忽患痢疾。密不使人知。自強之性。不欲以老病示人也。少愈。飲食不節。疾又作。醫云。非戒口不可。小愈。左右勸進飲食。食寒具。及餅餌。皆不易消化之物也。諫之不從。晚忽酣睡。次日仍不醒。羣醫束手。余等益無措。醫有謂呼吸如常。六脉無異。必無妨者。試之。果然。少釋杞憂。初七夜。侍疾退。兄以明日有祭孔子廟。侍班。差甫返行。有恒堂未入室。卽有內監追至。云。王爺神色忽有異。急就視之。奄奄一息。又延二刻許。薨矣。余輩號天罔極。哀哀父母。生我劬勞。今日憶及。猶不知涕之何從也。大事出。無資理喪事。兄於先嚴在日。每逢崇文門監督薪水領到時。輒以若干欸進。備不時之需。時崇文門發至第三季津貼。已進至六千兩。均儲先嚴室。而未用。比事出。余輩哀毀之頃。無暇問及儲欸。遂爲人假遺命。並一切器物。朋分以去。兄曰。陳尸不斂。而追問私財。予不忍也。出私囊兩萬金。營葬事。並修祠。

堂。堂庚子爲匪所毀者也。由是親戚故舊。人無間言。先定恭親王園寢。在密雲縣。其旁爲先父在日所擇吉地。乃以葬焉。旣服闋。由宗人府帶領引見。奉

旨著毓朗承襲貝勒欽此。余兄遂奉祀事矣。按王公世爵。自國初相沿。缺出。爵之崇卑予奪。一遵

朝旨。初無定法。故例載。有乾隆二十九年奏准之案。後例案雖屢有修訂。而引見時。必曰請



旨襲與何人。而

旨則曰。著某人承襲。卽此故也。固倫額駙景壽之以弟先兄。愷親王後嗣之降兩階承襲。皆其類也。宗人府則例。宗室支派。嫡庶出。非但以子計。並以孫計之。孫係妾出爲庶孫。不問其父之嫡庶也。故例載。王以下出缺。以嫡長子擬正。嫡長子已故。以嫡長子之嫡子。或嫡孫擬正。嫡長子已故。又無子嗣。以嫡次子擬

正。無嫡出子。以庶出居長者擬正。其餘酌量擬陪。仍以近支有分之人列名。余兄之襲封。罔係奉

旨著其承襲。亦正以庶出居長故也。襲封後。未開侍郎任。兄固辭之。乃以

御前行走。開侍郎缺。按例。王貝勒爲一級。貝子公爲一級。王貝勒不得兼二品以下職任。余兄嘗曰。吾不願以一人貪多務得。而破成例。貽幾同列作俑之譏。果出自 倚畀之隆。固不敢辭。若自擇肥而嗜。失所據矣。故力辭也。不知者。以爲異。更有挾怨以媒孽兄於肅邸者。是真過矣。余兄辭後。肅邸了無風波謠詠。久之。衆亦悟其誣矣。余兄之任 御前也。自 御前大臣以次。多舊識。尙不以惡面目相加。半載後。有迎勞美艦於廈門之 命。九月。乃同梁尙書於役福建矣。



記歡迎美艦事

余兄自襲爵後。只効奔走。無他事。秋九月。忽拜命往廈門。歡迎美艦。以梁尙書敦彥副之。陛辭後。乃往拜駐京美公使。甫坐。門者白。梁尙書至。美使詫曰。梁尙書已來過。何復來也。梁入。寒暄外。無他語。既而與辭。出館。梁曰。請同車。有相告者。乃語余兄曰。頃慶邸自頤和園有電來。云電貝勒。適貝勒已公出。緣南省有電來。革黨麇聚廈門一帶。今又有電來。往廈者愈衆。電敦彥使見貝勒言之。余兄略一沉思。卽大笑曰。無他。與君共入雙忠祠耳。梁君亦輾然。概時已陛辭拜館。南行更無商酌之餘地也。余兄歸。卽密召余。授以處理府務之概要。授以轉度數盤啓櫃法。曰。苟有電來。余殉國。則弟可如法處之。余泣受命。兄囑須秘密。無使家人知。知則不成行矣。乃行。茲役歸。余兄有筆記。其詞曰。當余之別弟南去也。乘京漢車。車甚敝陋。諸不備。九月末。牀椅皆漆布爲之。涼如覆葛。路亦極顛簸不穩。余所睡床甚窄。布又甚滑。中夜搖撼。致墜床下者再。梁尙

書自上車後。以身弱不耐勞。頗困頓。參贊曾君述。縉譯唐君國安。皆暈車。不能來見。比車少停。兩人扶曾君來見。已憔悴不堪矣。夜經黃河大橋。橋甚長。余曾於觀秋操於彰。扈時。特開車至橋一詳觀之。橋上鐵欄皆覆置。以故。兩旁毫無遮護。駭人心目。茲以夜過。不復觀之矣。次早入湖北境。武勝關在山中。當年屯兵於山。山多削成平面。若市中所售糕點中。俗名切糕者。山中風景稍佳。但松枝爲樵夫斧斤所伐。多僅存頂上數盤。有若毛擇。間有花木。率蕪穢不治。比之東洋山水。大有愧色。此若飢人夢飯。飯之溢。食之不得療飢。徒朶頤而已。然初到河南。直如北窮沙漠。至此。千數百里。始少改觀。亦空谷足音。鞏然可喜矣。到漢口。入街市。卽覺湫隘污穢。使人不耐。墻壁塗抹。紅綠相間。一無秩序。登舟。視黃流浩浩。忽覺眩暈。自度。行將出海。此不過江輪。無風且未開行。若此。則海中遇風。當何如也。乃振作精神。力持不暈主意。以與之抗。乃大見效果。後海中遇風。衆不支。余獨能往來船面。不復畏風濤之搖蕩。卽賴此一振也。自漢口東

行。黃流汨汨。兩岸惟荒野焦土。山亦童童。除江西境外。皆培塿而已。兼之船大而行速。憑高下視。意興索然。非復一葉扁舟。水光接天之情趣矣。經安徽等省。內地口岸。率污穢喧囂。不堪記述。抵南京登岸。宿督署。南京城大而荒涼太甚。入郭。與出城無別。間於田畝間見大茅竹。徑三四寸。爲北地所無者。城負山臨海。形勢較佳。一擴大之彭澤縣寫真也。火車至鐘山而止。端午帥率司道等迎焉。督署較舊。宿其新建西式樓房尙佳。署中桂花正放。然香味極微。或未盛開故也。問午帥江南維新事業。輒不對。惟日約遊山水之間。游鷄鳴寺。莫愁湖等處。湖已荒廢。略似北京十刹海後海狀。有一閣。祀中山王。額爲曾文正題。江天小閣坐人豪七字。有一小引。概文正幼時志趣不凡。藉以況志之舉也。午帥囑咏之。時出莫愁畫冊。見有倫貝子題名。後多文人之詩詞。率皆美人香草之句。乃爲之題曰。莫愁湖畔柳千條。多少游人惜舞腰。畢竟雄王異巾幗。江天小閣坐人豪。末句卽用額語。以杜午帥疑宿構也。路經秦淮河。水濁而臭。時時掩鼻。

而過。兩岸竹樓欹斜。徒障人目。船亦粗俗不堪。至夫子廟前。河略寬。水略清。或少存昔日遺跡。他處皆爲市儈侵占。只餘大溝而已。不必名之河也。至明宮。有巨石。上若血痕。云係方孝儒敲牙處。及杖斃臣工遺跡也。有明一代之專制之威。可見矣。今人議論。不能以放眼四海之外。隨社會潮流。以求進化。沾沾焉。以中華夷狄橫梗胸臆。視此當爽然若失矣。南京留十日。遂去。臨別。午帥蹙額曰。奈何。既又言之。梁尙書曰。君又接密電耶。答曰。然。今又有刺客往廈矣。可奈何。予笑領之。遂行。至上海。住北洋公所。聞房爲蔡和甫公使所手建。院中皆地板。鋪毯設屏。若一巨室。上有罩棚。以故室中甚暗。氣亦不得流通。終日日色昏黃。不知昏曉。余性喜舒暢。頗不便之。上海道蔡乃煌。老州縣也。世故極深。有鄙倍氣。每餐必備燕菜等。而殺饌率不堪食。使人辭其盛設。固不可。偶問及上海物產。輒惶懼。若恐其有所索者。一笑置之。蔡道本非所夙識。以平日所見之例見疑。宜也。余每日輒遊行街市。以舒鬱悶。上海已大有老態。轉不如天津有少年

氣象。三馬路至有污泥垃圾棄道中。殊不足道也。時接廈門信。暴風雨淹沒會場。一時不能修復。故在上海留十日。惜滬杭路尙未開行。西湖風景不得一領略也。美艦將來。乃由上海乘海崎軍艦行。海中風景大佳。白鷗數十。追隨船尾。青天碧海。一望悠然。余生平最好觀物象之變。愈複雜。愈覺其味深長。以故早起卽登艙面。非兩餐不入室。午夜猶不忍去。見島嶼迎人。水天無際。時時變幻風景。心目無一刻停留。夜則一星燈火。若卽若離。視船尾則一道空明。循船來路。船舷左右。俯窺之。若燃輕硫氣燈。作月光青白色。映照水面。概海中微生物。被觸而放光明。舊說所謂海水陰中生陽。卽此象也。梁君身弱多不出。以余之終日瞻眺也。頗奇之。距廈門約百里。忽無線電鐘鳴。譯之乃閩督之電。請入口停泊後。約來船上跪

安。請不必登岸。以革命風聲甚大。恐有失也。余笑曰。予之來。受命迎美艦。苟不登岸。何以盡職。托病不出。人其謂我何。美艦來時。仍須登岸。則其險一也。

余不見廈門山水。脫殉國難。不亦慎乎。使復電云。必登岸。請勿來船。午正至廈。俟岸上備接見公所訖。未正登岸。至砲台接

安畢。衆勸回船。余不可。曰。余固知會場爲水所沒。濕不堪居。然鼓浪嶼。余已前期訂寓所矣。松制軍尙藩台頗以租界不能派兵保護爲慮。余遂往會場少坐。梁尙書留。余去至鼓浪嶼。青天碧海。風景頓殊。白鷗與帆檣往來。蕭閑之致。使人忘倦。回視廈門。則亦一海島耳。乃市中不見海。不見山。天且一線屈曲。兩旁屋中。白晝燃燈。穢污狼藉。肩輿兩旁扶轎杆武弁。時時釋杆退後。街窄不容並行。對此真天淵也。寓樓四望。濃陰環匝。上山路寬而修潔。西人士女散步於夕陽影下。殊少喧囂齷齪之態。樓院有白玉蘭樹極大。幾若北京之槐。香聞四鄰。沿途瞥覩一筵蔴。高不異常度。而老幹重重乾皮。若蕉心頗厚。已拱把矣。似多年不枯者。抵寓。問閩督署所遣辦差者。茫然無以對。予笑曰。試循來路自見。乃去久之。歸曰。是筵蔴也。福州人視廈。幾如外域。言語風俗。亦頗有不同。隔閼甚

矣。故從者。每聞土人言。問之省城人。輒不能解之。次日拜美領事等。初余之至廈也。德軍艦鳴砲二十一響。以歡迎之。概西洋對皇族禮也。初中土不尙西禮。無鳴砲之舉。李傅相以北洋大臣侯爵出洋。舌人索鳴二十一砲禮。遂沿成定例。至是。閩督至。德軍艦問歡迎砲數。翻譯以此禮答之。德人不可。遂以二十一砲禮迎余。以十九砲禮迎梁尙書。卽止。此亦中國不明白規定之過也。無何。美艦至。計十六艘。船極大。來人亦衆。余同梁尙書。往船上歡迎。美提督殷殷感謝。相見甚歡。邀余觀其艦之內外布置。問余能入其砲台一觀否。概入台須由樓梯登由穴而上。余曰可。乃去冠。掖褂襟朝珠。鼓勇而登。入見砲膛甚鉅。一切裝送子彈。掃刷砲身。皆電力爲之。洵利器也。歸乃預備歡宴來賓。既夕。美艦盡以電燈重重緣之。遠望之如貫珠。我海圻效之。然渺乎小矣。會場備種種遊戲之具。任其兵丁賽之。並燃廣東五色烟火以助興。室中演廣東戲。設席款客。自申刻起。率至午夜始止。次日如之。時在十月初旬。余著單蟒袍補服。猶揮汗也。會

場外無樹木。惟哆囉麻數叢高過人。俗呼爲龍舌掌是也。無何。至初九日。廈門鼓浪嶼西人紳商士女。請艦上人茶會。是日白晝艦上官兵皆不至。松制軍欲宴予於會場。時予正持先嚴服。以王命不敢不從吉。周旋王事。私宴則不便往。乃婉辭之。連日困於公務。俗不可醫。思登眺以舒懷抱。乃潛出杖而登山。只一童從焉。旣爲護從兵弁所覺。大驚。羣來圍護。肩輿亦至。時戒備正嚴也。余却之不得。乃乘肩輿使之西行。茫茫無定處。至一破廟少息。小雨亦作。衣衫盡濕。周視島四面。一面與大陸若斷若續。海天空闊。但少林木耳。余平生喜登眺。尤喜見未嘗見者。至是。心目一快。比返。已行十七里矣。歸至會場。始上燈。聞日間松制軍等正宴梁尙書及隨員。忽有一人環場而窺。巡警喝之。卽奔。追捕之。搜其腰間。刺一長咫尺。鐵環鐵搬指各二。概行刺者也。聞已交縣。後不知其所終矣。問之松尙二公。輒唯唯。概舊日風尙。有變不欲張揚於外也。初十日早率梁尙書以下在會場北向叩祝如禮。午後接待來賓如初。十二日外賓去。送行

如禮。梁尙書病莫能興。適有廈門工人等。挽唐國安來訴。美人對往菲律賓賓島。工人嚴厲不中情。乞緩頰事。余乃同唐國安往鼓浪嶼。見美領事。言工人苦況。如貧民貨薄產往菲島傭工。往往未登岸。以目疾不許逗留。逐回。比歸。家已罄。再往。無力行矣。又如工人在島久。往往假歸。一時不能往。輒取銷執照。再往費又不貲。其餘皆工人不便處。商美領事更張之。領事許爲電美國政府。後余歸京。接領事公文。及工人團體謝函。則驗眼已改就內地。俾省工人船資。假期則展爲二年矣。余起身北歸。梁尙書假回廣東。余獨率員司行。路遇大風。隨員等盡臥不能起。次日風逾猛。初。隨員繼昆侯尙能來見。下午亦不能來矣。隨侍人等已無在左右者。只警巡延年。外部供事某。日侍左右。予惟以抵抗二字支持之。久亦不暈。飲食臥起如恒時。獨登最上層。見浪花飛舞。高十餘丈。彳亍行至船首。視司機者。時時查看海圖。以定方向。比近上海。風始息。登岸。卽有美人李佳白來見。力邀擇日往爲教民顏信厚襄開幕禮。以差畢欲遄歸。謝却之。余之

往也。在上海留十日。時梁尙書同在也。因思今獨歸。脫有疏失。人將謂我何。乃決意不稽留。晚乘火車至鎮江。拜業師承太守璋。以先生公出不便留。去之焦山宿焉。天氣大非前比。葛衣涼甚。遂爲薄寒所中。夜發熱不能安睡。乃江中所駐水師。力請登山觀操。不便固辭。乃乘肩輿登。未至頂。疾頓愈。風拂拂不覺寒也。無何。開操標設江心。洋船皆避匿。民人漁舟則滿江。往來如織。問之。云屢以旗示之。令避去。不從也。既砲屢發。皆距目標極遠。久之。無中標者。問漁舟不避。不至傷否。云曾預備左相觀操。時一舟子年十七。爲砲所中。喪其元。予曰。予過客也。脫有擊傷人民之事。予何以自解。乃止之。操未畢也。返寺。寺僧出蘇東坡玉帶相示。求詩。題付之。遂遊金山。晚江寬至。乃登船西去。船極窳敗。行動極慢。艙內裝潢亦閹淡。偶在艙面散步。二三等倉之婦女。羣來窺視。且囂喧不已。問船中買辦。非大餐間之客。亦可來艙面耶。對曰。不能。問何以頻來倉面。皆二三等倉之客。且囂囂不已也。曰。請出諭禁之。予笑曰。船中規則有定。予不敢違。更

何能越俎代庖。而出諭耶。旋船主來見。西人也。而背有油滯。若爲髮辮所污者。中且綻裂。其腐敗可知矣。予因不肯出諭。船主乃以一繩圍入口。覘之。竟無人敢登矣。次日予至頭等艙視之。灰塵糝地板上幾半寸。穢污不堪言狀。嗟乎。招商局之不堪。一至此乎。視兩洋之船。真有天淵之別也。至南京。易新濟船尙新。此行近江西廬山。山頭忽有片雲。自早起即見之。亭午仍不散。然除此片雲外。實晴空明淨無滓也。兩點後。雲轉巨大。迄日落不去。按山巔之雲。必無一刹那停留。南省江上空氣濕潤。附物失其溫度而凝。隨生隨滅。午後氣縮而雲愈重。視之若常在耳。因以小詩寄佗後齋將軍。曰。江岸多赤壁。匡廬獨有雲。長天沈瀟裏。惆悵一思君。船近鄱陽湖。窺之頗饒勝趣。較一路風景爲佳也。抵漢口。適有專車北上。乃下船登車。不少畱而發矣。至保定。微聞兩宮疾篤。入京。適是日

德宗崩。晚接宗人府文。已派充恭代。奠酒之差矣。次日

孝欽顯皇后崩。而

今上御極。醇邸攝政矣。以上兄之日記所載者也。

記兄任步軍統領事

十二月十六日有

旨。著毓朗管理步軍統領事務。欽此。初。提署原分設兩翼五營。專司衛戍事宜。五營皆漢兵。兩翼皆八旗壯丁。道光年間。先祖定敏親王。以工部尙書管理步軍統領事務。時曾爲之釐定章程。所謂金吾事例是也。庚申以後。日漸腐敗。一切廢弛。甚至堂司各官。以兵缺按月均分。盡入私囊。有事。現募之於市。無所謂兵也。庚子之役。川島募旗人練巡警。設警務處。

回鑾後。接收地面。始設工巡局。時步營幾在若存若亡之間。那相任步軍統領。憂之。乃令兩翼五營各招練若干人。給以軍衣槍支。名曰槍隊。至是。吾兄乃盡數擴充之。惟署中員司。兩翼五營。無贊成者。概營中本無多兵。一旦編練之。不啻扼其吭而奪之食也。初。余兄歸自東洋也。檢工巡局簿冊。惟一四等警巡爲最高級。召視其人。極精明。但未曾入過高等。乃調之西南局。以增其閱歷。其人

即提署左翼總兵烏君之貴介弟振林也。比余兄求足以變更提署舊制之人。不可得。乃調振林回步軍統領衙門。使編練圍營槍隊。假以全權。提署陋規數萬兩。盡以付之。修西丁字街西式樓房一座。以爲中樞。購辦槍支衣服。修理分駐處所。親自挑兵。付之訓練。內外堂延聘卒業生教之。步軍統領衙門。遂大改觀瞻矣。先是。兩翼五營。抱殘守闕。兵額雖衆。以有警察辦理地面。盡數干沒。有事需人。則惟現雇人充兵。至是。嚴查兵數。使長川住營。朝夕訓練。營翼不得不退出兵餉於公家。由是文武官吏悉大譁。有左翼翼尉福壽者。烏總兵之義子也。素驕矜。屢恃勢抗命。余兄一日至左翼。福壽接見。余兄詢翼中事。輒函胡應之。旣而曰。章京須去。伺候老爺。（指慶王）看視水龍。余兄問何事看水龍。曰。慶府立水會。新購到水龍也。問慶邸自立水會與本署何涉。曰。會中皆提署人也。問公私權限如何分別。不能對。乃告之曰。果慶府立會。爾翼中人在會。非我所問。然出動不得服翼中制服也。旣又請去。云時已亭午。恐老爺已下朝。余兄笑

曰。水會。私事也。我在此。公事也。脫有詰問。於事何害。爾不得行也。福壽氣大沮。其平日驕矜怙勢也如此。振林爲挑兵結怨福壽。遂有買人行刺之舉矣。

記左翼翼尉福壽使人刺振林事

一日振林來回編練新隊事甫去。即聞伊行至皇城東北角。有呼使止車者。即有一人登車。一手奉簾。一手以鎗突擊。格之不中。振林陡由車躍下。奔官廳。刺客再擊之。已入室矣。向室擊之。中室壁。乃就獲。時振林稟未到。福壽即來見。云適間有人鎗擊振林不中。刺客振林家護兵也。且有曖昧事。烏珍逐之。故挾怨。求勿深究。以全顏面。兄笑領之。兄乃往見醇邸慶邸陳其事。並乞免送法部。比提署審刺客。以形近瘋顛。語無倫次來報。駁之。仍以瘋疾稟復。乃飭解交習藝所焉。自刺客交習藝也。署中人心始釋。一日余兄忽命駕至皮庫胡同習藝所。所中固皆余兄初立時所委任人也。乃問其日前提署交來人犯何在。所長命帶之來。則一貧窶之少年也。余兄曰。爾刺振林乎。曰然。問何故刺之也。嗶嚅不能對。乃慰之曰。案已結。此地提署人之所不聞。爾可實供矣。乃曰。刺振林。福壽使予爲之也。驚問之。乃詳述如何許其養贍。如何酬以錢幣。並許其事過法

部時可以含糊了結。已爲之情托法官。但期事成有賞。可放胆爲之。不虞失敗。事旣未成。不意不送法部。長此囚繫也。泣求省釋。余兄乃以言慰之。歸卽召振林。告以真象。但以福壽乃烏總兵之義子。踪跡極密。使之歸商之。乃兄果欲根究。卽可推翻原案。俾成信讞。振林次日來言。其兄已嚴詰福壽。福壽悔罪。泣求免究。振林以其兄故。乞免究。曰人旣未傷。行刺者亦獲。請卽結案。允之。

記兄任專司訓練禁衛軍大臣事

自庚子以還。八旗生計幾絕。自設巡警。收八旗子弟訓練之。漸化無用爲有用。旗人習慣漸改。不復平日。愛聽梨園歌管聲。不識槍刀與弓箭之陋矣。濤邸納良弼之言。請設禁衛軍。攝邸曩在陸軍貴胄學堂聽講日。獨器重余兄之勵志勤學。至是。使同任訓練大臣之任。良弼宗室也。遠祖以獲罪削籍。及良弼身。留學東瀛。值排滿之風正盛。良君獨以排漢抵之。其人慷慨有大志。同學漸多服之。歸。服務於陸軍部。鬱鬱不得志。至是。感濤邸之知遇。主持一切焉。良君勇於做事。待人無畦町。如吳祿貞等。皆其至交。更遍舉同學武人。充禁衛軍官長。以其爽直坦懷也。然羣小迎合之。亦往往墮人術中。良君勇於作事。而闇於知人。余兄時規正之。輒不悅。鐵尙書不以訓練新軍爲然。力言於余兄。余兄問其所持理由。不以實答。概老輩出言。皆極謹慎也。軍成。成績甚嘉。良君又徇人言。招土人入軍。余兄尼之不可。乃招兩營新軍。土人極笨。工倍而事半。概槍馬

非其所習也。無何。濤邸有使英之役。余兄總司其事。親查各營。多有不守規則處。乃一再飭責之。羣小胥怨矣。概良弼性伉爽。喜諛詞。其下多以唯諾取容。實心任事少。且多不能恪守規則者。其後良君隨濤邸歸。其不得意之軍官等。以余兄督責過甚。訴於良君。遂思拒余兄。引慶邸次子。擄將軍任訓練大臣矣。無何。遂有軍諮府之設。

記設軍諮府事

就陸軍部軍諮處。改設軍諮府。從良君弼等之建議也。濤邸與余兄充管理大臣。以馮君國璋充軍諮使。原軍諮處各官。分別授軍諮使廳長。章制多採兩洋成案。中國未有軍用地圖。設第四廳。遍測近畿高下尺寸。尤爲創舉焉。軍諮府但司謀畫籌備。至協贊一切用人行政。皆仍歸陸軍部。久之。余兄以拘執。漸不容於勇猛任事諸生。遂有以軍諮大臣不能用二人之說進者。一日余兄正在署中。久候濤邸不至。比至。笑謂余兄曰。今日幾屏君於府外矣。概有人以軍諮大臣不容有二人爲言者。余往見攝邸。請去。攝邸力持不可。此後仍與君共事矣。相與大笑。共事如初。初軍諮府本購法文學堂爲公署。價至十三萬。支應寶某實司之。至是擬收買東鄰地。自建新樓。需款百餘萬。濤邸及余兄均不肯任其事。寶某乃聲言。載摟將軍薦雷虎公程司包辦一切。乃興工焉。

1911

記余兄任法政學堂總理事

陸軍貴胄學堂既卒事。久之。任潤貝勒爲總理。張君紹曾那君晉充監督。另擇地授課。乃有以宗室習武而不習文爲言者。乃設貴胄法政學堂於原陸軍貴胄學堂處。余兄充總理。熙君彥錫君鈞充監督焉。初。王公子弟多失學。庚子。八旗子弟多就各學堂肄業。王公子弟求學者漸多。間有沾染舊習。不悅學者。余兄乃奏請飭下宗人府。非在學堂畢業。或修業者。不准應應封考試。以督責之。每日功課多由錫監督躬自檢查。以故諸生尙循學中規矩。遇便余兄輒集全堂教習學生。親自立而演說於衆。往往歷一小時許。備陳西力東漸。學問日新。諸生苟頹惰自甘。則吾族將受淘汰。無可挽救。反覆申明此旨。以故各教員皆不尙粉飾敷衍。間有所任課程。非教員所夙習者。余兄親檢課卷以指示之。如查出光學課程之誤解。某教習卽辭謝所授門類。教習中如蒲殿俊鄧鎔。皆有名於時者也。

記余兄任軍機大臣事

余兄之入軍機也。初無消息。一日忽召見。攝邸問盛宣懷何如人也。余兄對曰。有才能之人也。惟以某所知。伊曾司鐵路輪船電報等重大事業。家殷富。然未聞有益國庫之入。且各局率多泄沓。少振作。餘則未知也。退。卽聞盛某著卽回交通侍郎任之。

旨下矣。嗟乎。未一載川漢鐵路事起。終以亡國。使盛公不陞尙書。或尙不至此也。誰實爲之。爲之何哉。余兄不可謂非先見也。然怒之怨之者。固大有人在也。無何。

朝命下。余兄同徐公世昌入軍機。次日入值。同人有異色。亭午。忽

隆裕皇太后召攝邸。良久不下。慶邸與那相約略其詞。相視而笑。旣而軍機章京報攝邸退而歸府矣。慶邸問有何諭旨。云無之。驚謂那相曰。何以無之。那相漫應之。旋曰。無事可散矣。遂散值。歸後。微聞某方面。訴之。

皇太后。太后怒。召攝邸。欲收回成命。攝邸固持不可。乃已。此後每早召見軍機。四人同上。少坐。卽退。復召回慶邸那相。始議朝政。余兄及徐相。固不得與聞。攝邸重違。太后意。且避嫌也。日日如此。約四閱月。後於召見軍機大臣畢。復召澤公倫貝子。時甚久。退而朝旨降矣。初。徐相同余兄之待慶邸那相也。往往需一小時。至此時。慶邸那相之待命也。或過之。幾日日如此。慶邸不悅。曰。今日又不得朝食矣。久之。二公又囑軍機處。不得登召見某某之事。慶邸愈不悅矣。無何。資政院開。力邀慶邸出席。有所質問。又有質問書。問軍機大臣性質。是否負完全責任。概樞府久不鑒於人心。革命心理乘之。固意在推翻政府。另組內閣也。而熱衷者。更聳湧之。暗中主持。思皖而代之。尙不知天下之危也。噫。

記余兄往資政院事

資政院力邀慶邸出席。不得已。擬以軍機大臣一人往。公推余兄。余兄乃毅然受命。退謂人曰。予非不能婉辭也。予苟辭。將無人出席。事愈焚。而恥莫大焉。明知樞府叢怨久。且革命暗潮正烈。實無善法以處之。況伺隙者。視予後。剛則將曰。某已安撫衆議員。可無事矣。而彼實激之。某可告無罪。將辭職矣。柔則又曰。某已鎮攝之。彼實示之以弱。復致囂凌不可制矣。請辭職。余兄固無以求全也。屆時往會場。既出席。宣讀答詞甫畢。卽有起於坐上。質問者云。朝廷對於速開國會。是否贊成。余兄答曰。朝廷已有旨。將開御前會議。取決於衆矣。又問軍機大臣所負責任若何。答之曰。此事已接到貴會質問書。日內卽有復文到院。此時不便以口語答復。又有起於坐上。問軍機大臣是否贊成速開國會。答之曰。慶邸諸公是否贊成。非予所知。要言之。此時固無反對之人可知也。又問貴大臣是否贊成。抑係反對。答之曰。國會是否宜於速開。本大臣籌之已熟。惟

日內即有御前會議之召。此時不敢先行宣布。以涉猜嫌。又有起於坐上者。質問未已。卽有攙越而問。語多啁哳。不能了了。遲之又久。有言質問時間已長。當開議他案者。乃退席。概歷兩小時矣。既退旁席。那相徐相皆曰時已久矣。乃歸。既而聞仍有以答詞不善訴之慶邸諸要人者。人皆笑之。概同人正以余兄平日負畏蕙名。至是正驚其沉勇之氣。不可嚮邇。計遂不售。某君亦無他意。不過明知無善法以卸責。欲歸過於人而已。次日某議員所開之國民公報。卽揭之曰。昨日朗大軍機到院。舉止安詳。神情鎮定。胸中似了了者。然出言滑脫。按之殊無實際云云。其當日情形可知矣。後有人以之問余兄。余兄曰。予之到院也。請諸極峯。慶邸。皆未有所表示。不得已。請慶邸飭章京擬就答詞。持以往。余同徐相甫入值樞垣。備位而已。更何能有所主持。非不欲以虛言要譽於衆。取悅一時。實不欲疇張爲幻。蹈人覆轍也。果問予之所見。國會固宜早開。籌備寧非最要者。苟不求實在民意。豈不更買櫝還珠耶。中國戶口未清。學識未足。假立

憲庸非禍國取亂之道乎。要當督責籌備之真假。不當爲葉公好龍之舉爾。然舉國洶洶。惟求縮短年限。速開國會。豈容少有商榷之餘地。固無暇求真是非也。予不敢盲從。亦何敢以代表資格。爲朝廷欽怨耶。報中之言信也。該報館主人。卽質問余兄個人贊成反對者。余兄幾窮於答復者也。次年資政院開設內閣。以慶邸充總理。那相徐相副之。余兄遂退出。余兄既退。乃以軍諮大臣仍與濤邸共事。旋授內廷行走。一日夜半。忽有電話。云有極要事件。濤邸候商。乃赴軍諮府。至則人已滿矣。有一軍官且泣且言。云來自灤州張紹曾軍。邀朝廷讓一切政權於內閣。其軍洶洶欲變。危在眉睫。明早苟無旨宣布。京師卽不可問。危詞聳聽。聲淚俱下。環顧左右。有索索戰栗者。舉張皇無措。然細審之。殊無至此慄慄之事實。遂悟其僞。不爲動。既而衆謀請濤邸同余兄往見慶邸。余兄笑曰。此時迨丑正矣。趣慶邸起。則老人體素弱。經此震駭。明早必不能上朝矣。如此。是欲速而轉遲也。不如往見那徐兩相。衆以爲然。乃行。兄於車中謂濤

邱曰。慶邸素無主見。見必諾之。而旋食前言。從此多事矣。吾故爲此言以緩之也。既見那相。不置可否。徐相旋來。議久不決。忽良弼求見。見卽曰。議旣不決。請俟異日緩圖之。遂歸。初張紹曾之帥師入關也。余兄往開平。閱視其軍隊操演。演畢。同往北戴河一觀。未有異也。至是。固知此舉乃左右之所爲。非張一人之謀。意雖圖強。計實疏耳。

記辛亥禪讓事

辛亥秋。武昌革命事起。正值濤邸閱操於開平。就近發兵赴武漢。濤邸欲親率三軍往。不得。朝命乃止。大軍抵武漢。廢大臣昌任征討之事。戰稍不利。乃調砲隊往。初有言南省地多江河。不利轉運。不必以砲往者。至是。叛軍列砲於江岸。兵士多所傷亡。良君弼始悔其誤。乃補發焉。兩軍固守日久。無開戰消息。一日。余兄自內廷歸。閱邸抄。始悉有旨召袁君世凱岑君春煊。時伺將軍在客座。笑曰。公非甫自內庭歸耶。亭午予卽知之。此時已交申矣。公猶未知之耶。既而岑雲階不至。袁慰庭入見。未幾。袁慰庭組閣。各部大臣均退。其內容何如。余兄以非閣員。不得聞也。時事日亟。消息愈寂。一日。隆裕皇太后忽召見王公等。商禪讓事。當時恭親王溥偉。肅親王善耆。鎮國公載澤。爭之甚力。至於泣下。王公無贊成禪讓者。久之始退。遂無結果。先是各軍隊忽接油印傳單。大意曰。袁世凱力持危局。保護朝廷。只知君主立憲。奈不勝

王公某某等。主持共和之謀。將憤而辭職。次日卽有此一召。其爲趙君秉鈞等。懼軍隊之不服。將假禍於王公。事成。則聲罪致討。旣剪宗支。又除悍將。不成。固歸過王公等之不忠。以留餘地。不虞此次之一意抗拒也。旋有旨。再令王公等商之趙君秉鈞。余兄知與虎謀皮之無益。遂獨憤然拂袖歸矣。後與人言及當日情形。曰。朝廷自王公等大臣全體辭職。兵權政權財權。盡歸一人之手。用人行政。盡一黨是從。此時欲責皇太后堅持不讓。事已無及。甚則弑逆之禍。在所不免矣。余固不贊成禪讓。而不敢爲激烈言也。已而余兄密謀扶危定傾之策於川島君。久之。以始終未能得極峯手書。事遂無可爲矣。

記洪憲元年夏余兄擬東渡不果事

袁世凱帝制事起。余兄憂之。思爲避地之舉。恐事泄。雖家人未嘗與言。擬抵東後再謀接眷屬。臨行往見日領事某。領事忽問曰。公此行奉有密旨。或攝邸之命耶。余兄曰。否。領事踟躕者再。曰。如此。則將大不利於皇族矣。袁總統必疑公奉有密命。公去。將疑皇室矣。余兄愕然。既而曰。余行李已具。船已訂定。明日行矣。奈何。領事搖首曰。公去。諸邸將被其禍矣。余兄遂茫乎無措。久久不能接談。既而謂領事曰。容熟思之。明日之行。暫緩可也。乃歸。歸來一夜無眠。輾轉達旦。早起。汗濕衾褥。去住兩無所可。過余姪婿家。余姪女問曰。父面色何如此紅赤。神色惘惘。豈病耶。笑曰。未也。適行急耳。晚間。忽接京函。姪恆醇患疹症。速余兄歸。余兄正猶豫未決。遂藉觀姪病回京矣。未久。卽陡患類似風癱之症。時距歸京未匝月也。幸美醫盈大夫注意調治。一星期許始起床。然左足若廢。孑孑不良於行。與人不能多接談。雖視他人長談。亦汗出如瀋。精力不支。如此者。

半年。漸能行走。言語亦漸復。惟時時心跳頭暈耳鳴不已。乃往就醫於津之德醫施密得。施診之曰。腦筋病耳。藥之。大輕減。可緩行里許矣。自此時順時逆。迄今尙未完全復原。概思慮太過。腦筋之傷甚也。

記兄任宗人府堂官事

宗人府宗令禮親王世鐸薨。容親王魁斌補宗令。時宗署掌印松某主事。暗結歡於某公。時恃外援。事多叢脞。容邸思有以箝制之。因與同寅力爭於醇邸之前。始引濤邸及余兄補左右宗人。然不久卽爲移署事。不勝松某之術。憤而薨。濤邸超陞宗令。余兄轉左宗人。旋倫貝子以他就辭左宗正。余兄遞陞右宗正。順邸薨。余兄應陞轉。讓諸潤貝勒。不可。遂轉左宗正。初宗署以年久。大權旁落。兩司書手。實操政柄。容邸初任宗令。書手卽以索歷年虛捏欠欸移之。容邸無以應。概內務府甫擬每年給宗署經費五萬元。而所發係紙幣。又拖欠經歲。或僅按季以一成五中交票付之。故冷署幾無以卒歲。自濤邸主政。余兄佐之。漸收權於長官之手。宿弊爲之一清。不得意之司員書手。屢思播弄。迄無著手處。乃串通東省地痞。控宗人府查復地畝事。由內務部轉內務府行宗人府查覆。語獨侵余兄。其意在懾之也。司員等皆以檔冊無憑。束手無策。余兄閱之笑。

曰。是不難。檢東華錄

太祖位下。自可覆之矣。概所控因一早年削除冊檔之宗室。追認圈地。莊頭久已據爲已有。不肯歸趙。又無辭以拒之。勾結書手。知冊檔已削。故爲此狡獪也。殊不知削檔宗室。仍隸旗籍。旗下之冊檔猶在也。有司受託。因檔上無名。欲卽以無其人覆奉天。余兄不可。令行查正黃旗旗檔。故若輩思中傷之也。復文出。事遂白。

記余兄選參院議員事

自張君勳請黎總統解散國會。旋復辟。黎元洪退去。段君祺瑞戰敗張軍。朝廷有旨宣布。未嘗與聞其事。大意謂自

隆裕皇太后不忍人民塗炭。禪讓天下。贊成共和。六年於茲。初無復辟之意。事實俱在云云。時迎馮君國璋代總統任。乃另開選舉會。各省應之。組新國會。余兄謀之濤貝勒曰。今國會將開。參議院議兩院組織法。夫兩院。各國之通例也。今設兩院。性質無別。重訂必改之。而吾滿人。名列五族。遠不如蒙古有專額。得維持一族權利。衆院選舉以地方言。固難著手。參院。在君主之國用代表貴族。美用代表聯邦。今我國正當以參院代表五族。毫無疑義矣。乃上書府院。詳述理由。文中以前人成說爲證。俾以取信。無何。議院採取其大意。參院設滿回王公專額。由籌備國會事務局。行文內務府轉行宗人府。調取王公銜名。屆日。開選舉會。初擬舉濤潤二邸。旋以濤邸少一歲。潤邸有都統職任。格於成例。欲舉

余兄。兄曰。上書府院之謀。出自余口。今若當選。是自謀而自得之。所得者小矣。若諸君當選。爲吾族開一脫存之路。所得大矣。他日改選。余當之。未爲晚也。衆不聽。卒舉之。莊邸友人某代其謀於八旗公爵投票選之。宗室王公不悅。互相牽掣。致重勞開選。余兄謂人曰。我輩甫爭得選舉權。事苟不集。人將笑我無團體之結。事且敗矣。乃在投票所集八旗投票人。問將舉何人。僉曰。除前舉公外。擬舉莊王溥緒。余兄謂之曰。宗室中人擬舉慶邸。今君等舉莊邸。則兩邊俱不足舉。法定票數。則此次又虛集矣。衆執不可。又謂之曰。吾輩甫得選舉權。前已不足法定票數。致缺一額未選出。今只一額。又不成局。則吾輩事且敗矣。奈何。衆堅執如故。余兄踟躕良久。曰。若然。則吾可隨君等投莊邸票。俾足三分之二。惟榮公之候補票。宗室中均贊成。希君等勻半數投慶邸爲候補。俾此次了結。不致重勞當局。又開選舉會也。衆諾。乃投票。及開匭。則莊邸當選。慶邸仍以票不足數落選。概余兄固踐約投莊邸。而八旗復食言也。嘻。我旗人以私害公。一

至此耶。亦可憐矣。後選定。余兄及莊王溥緒充參議院議員。慶王載振承恩公榮全充候補參議員。余兄到院後。卽提議案請頒民刑兩律交院。以爲人民謀安全。三年期滿閉會。初。余兄同莊邸。本簽分六年。卽連一任。值事變。此後國會命運。在不可知矣。當直皖兩軍戰事起。兩院議員多受指摘。余兄乃緝自爭議專額事。迄登通告。凡院中所提之案。不入黨會之據。均另刊第五部選舉續記一冊。記其事實焉。

記余兄被選同鄉會名譽會長事及辭都統事

余兄之選議員也。選舉事務局將宗室旗人均註旗籍。余兄既當選。函參院更正。大意謂僕等本奉天長白縣人。今議事錄書旗籍。查旗籍本非籍貫。不過軍隊編制。所隸某旗而已。與全院之通例相背。合請更正。遂更正爲奉天長白縣人。會張巡閱使在京擴充會館同鄉團體。乃承同鄉推選。充名譽正會長焉。久之。守護

福

昭兩陵大臣缺出。余兄欣然願往守護

先人陵墓。初守護一缺。沿自辛亥以前。舊制以金州副都統兼之。金州久失。實只守護一差而已。比提出國務院三人。余兄與焉。會張巡閱舉馮德霖任之事。遂阻。忽有正白旗漢軍都統之授。余兄初有所聞。卽密函公府。請寢其事。函甫發。報喜人已持當日命令來矣。不得已。卽具呈以議員任務未畢辭。參領送印

鑰來。以業經具辭呈。乃交副都統佩帶之。旋陸軍部行當日命令及任命狀到旗。均使暫存於署焉。

跋

述德筆記吾弟紀實之作也 先考清德賴以流傳於世偉矣惟對於余多溢美之詞實余學淺平日有不能自抑處流路齒頰間爲所記取有以啟之余之過也讀者視爲敬愛之言別白觀之可也辛酉孟夏餘癡生跋

